

四庫全書薈要

• 乾隆御覽本

集部

欽定四庫全書薈要

集部

御定歷代賦彙卷二十二

御定歷代賦彙卷二十二

地理

遊天台山賦

有序

晉 孫 綽

(維東天)

山者蓋山嶽之神秀也涉海則有方丈蓬萊登陸

則有四明天台皆玄聖之所遊化靈仙之所窟宅也夫其峻極之狀嘉祥之美窮山海之環富盡人神之壯麗矣所以不列於五嶽闕載於常典者豈不以所立冥奧

其路幽迴或倒景於重溟或匿峰於千嶺始經魑魅之
塗卒踐無人之境舉世罕能登陟王者莫由禋祀故事
絕於常編名標於奇紀然圖像之興豈虛也哉非夫遺
世翫道絕粒茹芝者烏能輕舉而宅之非夫遠寄冥摛
篤信通神者何肯遙想而存之余所以馳神運思畫詠
宵興俛仰之間若已再升者也方解纓絡永託茲嶺不
任吟想之至聊奮藻以散懷

太虛遼廓而無閼運自然之妙有融而為川瀆結而為

山阜嗟台嶽之所奇挺實神明之所扶持陰牛宿以曜
峰託靈越以正基結根彌於華岱直指高於九疑應配
天於唐典齊峻極於周詩邈彼絕域幽邃窈窕近智者
以守見而不之之者以路絕而莫曉哂夏蟲之疑冰整
輕翮而思矯理無隱而不彰啟二奇以示兆赤城霞起
以建標瀑布飛流以界道覩靈驗而遂徂忽乎吾之將
行仍羽人於丹丘尋不死之福庭苟台嶺之可攀亦何
羨於層城釋域中之常戀暢超然之高情被毛褐之森

森振金策之鈴鈴披荒榛之蒙籠陟峭嶠之崢嶸濟
溪而直進落五界而迅征跨穹窿之懸磴臨萬丈之絕
冥踐莓苔之滑石搏壁立之翠屏攬樛木之長蘿援葛
藟之飛莖雖一冒於垂堂乃永存乎長生必契誠於幽
昧履重險而逾平既克濟於九折路威夷而修通恣心
目之寥朗任緩步之從容藉萋萋之纖草蔭落落之長
松覲翔鸞之喬喬聽鳴鳳之嗳嗳過靈溪而一濯疏煩
想於心胷蕩遺塵於旋流發五蓋之遊蒙追義農之絕

軌躡二老之玄蹤，陟降信宿迄於仙。
都雙闕雲竦以夾路，瓊臺中天而懸居。
朱閣玲瓏於林間，玉堂陰映於高隅。
彤雲斐亹以翼樞，皦日炯晃於綺疏。
八桂森挺以凌霄，五芝含秀而晨敷。
惠風佇芳於陽林，醴泉涌溜於陰渠。
建木滅景於千尋，琪樹璀璨而垂珠。
王喬控鶴以冲天，應真飛錫以躡虛。
騁神變之揮霍，忽出有而入無。
於是遊覽既周，體靜心閒。害馬已去世事，都捐投刃皆虛。
目牛無全凝思，幽巖朗詠長川。爾乃羲和亭午，遊氣高

褰法鼓琅以振響衆香馥以揚煙肆覲天宗爰集通仙
挹以玄玉之膏漱以華池之泉散以象外之說暢以無
生之篇悟遣有之不盡覺涉無之有間泯色空以合跡
忽即有而得玄釋二名之同出消一無於三幡恣語樂
以終日等寂默於不言渾萬象以冥觀兀同體於自然

桐柏觀賦

有序

元表 楠

孫興公天台賦運意高簡忘象以求斯得之凝和盧君
居是山以桐柏觀圖授余曰子為我演繹其景不揆瓦

石援筆而為之賦曰

厚坤載德台山效靈蜿蜒扶輿天孫之精仙書易之以
桐柏敞神界為金庭轆轤三光磅礴太空睇暘谷之倒
景卒莫能擬諸形容也睠彼華頂羣山啟蹤倡九牧以
執玉魏冠仰其顥顥香林玉霄夾驂以從華林不彫卧
龍從龍玉泉御右法蓮殿戎東峙翠微西蹲紫霄巧面
勢以規輔玄扃沉沉乎泐寥維妙有之珍館匪攀援之
可求除三彭之內蕩守中戒以默修影息於鄧林機忘

乎海鷗上池飲之以洞視金膏服之而冥摻不然者良
不能以久留也粵昔子晉韜精帝京弄參差於緱山搏
扶搖以遐臨瓊臺儼具龜負雙闕屹乎龍蹲正右弼以
贊化千齡髣乎氤氲故茲山也四面削成中心如掌真
風合乎冥廓梵炁通乎盱眙三井之泉千尺之潭皋羽
警其凜露髯羊匿於陰嵐飛梁凝冰側足涉褰翠藤流
霜觸纓捫緣校溪交流以織文忽蟠螭之鈎連望飛瀑
之懸絕日五色而成妍夫樂與餌過客所止夸誕逐魂

踐形者恥長生之藥渺茫於神山執期之候談譎於五
利却衰疏頑簡易理得其亦有所益乎菌蠢春秀實當
冬萌五粒之松三脊之茅丹光騰於金鼎冰泉徹於銅
罍服食之而不墜身輕忽焉以復丁企列仙之遺蹤葛
翁策名於太極斗宿晶熒於樞紐金光雜流於瑤席納
雷谷之砰磕窮幽淵之罔象丹鳳昔焉以來儀凡羽厥
今以避讓諒守貞以制氣匪狡獪以增誑法不孤立道
不虛行繼之者白雲先生受素書於軒轅襲帝胄以典

午憺寡言而無營思坐忘以遐舉承唐皇之明問敷清
淨之舊章署漆書於寶幢迎黃雲於玉堂厥後憲章希
夷範圍靈寶誦蕊珠之玄文過期頤以終考若是者誠
何異於蓬島或有言曰樓臺榮觀方士侈崇夷考是山
不綺而豐不幽而通廓予其有容閔予其託逢味興公
之快竒訊擇木之寫真若增其嶽崧盡其窈深身不羽
而凌邈俄曾城以瑤林若乃丹霞伏光鐵柯舒英集衆
妙以凝睇髣三真之傳經擬金剛以鐵磨警黑業於洪

鐘何錢李之二王莫能悟其祿終猿抱子以望月虎伏
威而調風靈瑋清以集鸞哀絃急而驚鴻爰自有而即
無眇一氣之鴻濛悼南國之蒸歎髣天都之肅烈彼夏
蟲與火鼠徒自煎以內熱申之以辭曰帝子下于雲中
質通明子粹中覽炎洲兮垢紛節容與子茲峰蓬瀛香
兮無極浪滔天兮不可以履境荒滅兮妄益曰此留子
吾將以內息神為尻兮氣為輿朝紫霞兮暮清都斥視
聽兮道靡渝歷千劫兮復故初雲凝素子中壇鈴流露

今日暇三災屏于嘉祉繁語夫世人于歸休乎靜觀

鴈蕩山賦

有序

宋

薛士隆

走家東甌有祠祭田在鴈蕩山下行年三十而未之到
隆興初赴調因取途焉愛其巘谷秀異無圖無錄莫之
能名念其山水奇甲天下而未有文賦欲賦之未可也
歸得建炎間郡丞謝君升俊山圖石本字多漫滅已而
得樂清洪丞歲所鑱新圖并賦歲正月望始得皇祐校
書郎章君望之山記又假舊圖於葉氏以補圖缺於是

圖籍大備顧皆叙次疏闊洪賦工矣而猶有未盡故為
集略成賦得而覆瓿誠何望於左思擲地有聲信多慙
於孫綽聊依準實寄意山泉云爾

溟渤轉乎東南鴈蕩窺其高峙抱層巒之四合聳羣峰
之崛起仙凡道絕類隔一塵摩空下望儼若屯雲聊登
臨以寄傲循石磴之縈紆移顧步於觀瞻瞥風氣之懸
殊幽谷之中別有天地玉筍排空而剡翠瓊館憑虛而
綺麗微埃不入其方寸纖土不留其度內峰夏雲之競

秀均倚劒於崆峒崢嶸萬仞之嵯峨羅巧妙之巖從粵若
遂初天愛其道靈山秘秀孰知其寶傳西域之仙書肇
棲神於羅漢睠人寰之緬邈極希夷之汗漫偏為幽獨
蓋始得於唐僧之詠看之不足此樵翁為之浩歎者也
我國家太平興國之二祀天下車書始同有禪師曰全
了庵廬初結於芙蓉行亮文吉踵於前甄昂作尉從而
後靈巖碧霄巔岼而並露南閭白巖孱顏之盡剖起初
凡七十有三年而後隴斷之不遺蓋成終於皇祐之已

丑稱始開於祥符之伐木者故適當其會謂遷就於貫
休之詩者見不臻乎首是知水鑿之為睫論其又何知
造化功成之不有乃其東望秀嶺道屬天台山川襟帶
於四明風雲呼噏於會稽無非仙人三乘窟之宅誰能
見其一日而數相往來其西則蓋竹雲門白巖白鶴魔
軍退舍而真宅斯建至人入竹而誠明可作洞天高遠
以誰訊福地潛通而巨度陰有楠溪其陽際海幹地軸
之磐踞望天涯之斯在崖有千里之石壑有萬年之松

金雀么而不大金猿綫而多茸樂官羣處而和聲山羊
歷險而純素若夫王孫麋鹿鷹鷂鳥鵲衆獸常禽之類
他山既多有之茲故不詳其名數山之狀也崇倚青天
峻連霄碧凌霞傑出於疎雲疊嶂牽連於紫極工如大
巧特若小高三巨相形而峯嶸獨秀孤立而巖壑瑞星
明而治世皆見霹靂轟而曠者不聞常雲舒而莫卷白
雨霽而猶零牛女從橋而星河可度雷張望氣而龍泉
可得璧月懸空而夜夜長滿朝陽薄暮而光明烜赫貫

香珠之落落起祥雲之疊疊玉峰高並於兩巒利孔開
通於雙穴積翠合於拾羽之衆紫微居而衆星拱列觀
架海之騰波浩浩望平霞之火炎烈烈苞有萑萑菌有
靈芝立筍圓而削玉丹桂茂而藥枝蓮花分拆而木末
可采圓蘿糾結而鱗比相差其於人也總者如角直者
如指圓者如臍礪者如齒佛掌高而頂可摩神迹巨而
武可履詣方丈而問維摩之居士行妙高而見香嚴之
童子龕巧合於佛影樹有同於僧寶五通變化之有靈

三清逍遙而適道天王朝祭而明堂斯在西真翔集而
瓊臺莫訪對人道術之相忘招賢仁義之為尚尋朝賢
之舊隱得侍郎之庵居觀音行而隨形示現羅漢遊而
飛錫騰虛三傑際風雲之會七賢從竹林之下五老來
兮書籍校千聖會子德星聚朝天義重於尊君抱兒愛
均於慈母爾乃展旗障日立戟排雲關弓飲羽長劍倚
天射埽遠而破的馬鞍跨而絕塵文筆擅塲於文會戴
仁踐履於安仁寶印得之而如斗金鼎負之而調羹啟

橐籥而布化鳴鐘鼓而振聲碑磨崖而沒字鏡無心而
鑑形乃有琢雙玉獻連珠咀文英讀靈書對棊枰舉覆
盃振藥杵火茶爐盞簪加導於仙冠折角尚賢於巾子
藏珠媚而淵水不涸爐藥就而羽人不死行道周遭於
石佛栖貞高蹈於迎雲空洞虛而無物雲霧合而神興
郭有石城度有石梁入有天門窺有天牕有堂有室有
斛有倉旌有石表蓋有板藏門樓高屹以超雲霓闕對
峙以迎陽澡身莫便於浴室修道何樂於禪牀考室而

柱金矗立蔽風而翠屏是陳版障駢而可隱行廊脩而
可循像有師子鹿影靈龜鯽魚三燕頤頤而穿幕戲龍
驤攖而含珠飛羣鳳之徘徊戲雙獅之矍鑠猴不可以
加冠魚有時而登陸羴羊挂角以棲止回鸞騫翥以翔
翔犬以警而司門貓以游而在堂龍倦遊而或卧虎已
蹲而更伏御火共施於鵷尾照水熟然於犀角天柱之
峰上凌空碧其旁無附其趾無蹠削貞珉而介出崇高
切於青雲圓度於規直中於緡望之者目極倚之者驚

神疑共工氏之不作不周末觸而今存此峯巒之峇立
者餘蓋不得而縷陳彼有同名而不相似者於彼吾又
何言其水則二龍之湫東瀑西瀑合掌摩訶劍峰乳酪
水簾眩日以舒耀新月弓彎而出谷清涼之滴滴無已
照膽之澄泓可矚彼潭之泳者湖鰻或澗而流之斤竹
決而下也銀河瀉而垂練委而去也錦文鮮而漬淥觸
潛蚪而聲韻鸞和漱堆埼而皴如皴玉委蛇而動行乎
巖石之間者何容窮盡又豈祇清溪之幾曲也泉流之

冠大者龍湫崖犇如仆氣凜如秋界青山而澎湃吸蕩
水之宗流上擬青空下臨無地霏微雨露之飄散晃朗
白虹之下墜乍垂雲而零露恍山崩而川至雖淮流破
荆山之堰曾不足以言其髣髴衆水之淵發源鴈蕩厲
巍巒之峻極浸山椒之修廣箴竹叢生以蒙翳娑羅挺
榦以駢羅征鴻攸聚牡蠣生之浮鐵船之蕩漾沈古鐘
之逸響派旁泄之崩波羌不以五水九旱而為之消長
傳或謂滄海此遺波焉今固莫詳於既往矣乃若浮圖

天成古塔神造香爐既設寶幢載好楞嚴翻大乘之典
寶陀襲白衣之號高僧梵唄之相和仁祠金碧之相耀
惟茲華頂花壇是陟居者有積行者有食無芸仙者之
田每駐遊人之屐然雖曠世而彌年猶未覩周遊而涉
歷者也爾乃樂成首路東驚幽尋絕白沙之古塞陟峭
嶺之芳林秣馬於芙蓉之驛驅車於長徽之原招提寶
塔屏障橫焉千巖萬壑是途伊始扶筇竹以自杖屐登
山而後齒於是竒巖卓犖怪岫崢嶸傍顧而塵慮都息

相羊而油然意生登寶冠之蘭若跨飛瀑之修梁引仙
簪而我首哀熏爐之裊香前眺諸峯翠馬亭直揖雙人
而問道屈凌雲而一息九龍垂頭而來下梅霖飄灑以
零零洗予心之宿累拂襟袖之泠泠望銜珠而返顧跨
伏虎於石門里連霄之十五窺蕩水之靈源凝神寓目
千里為近羣玉浮天全乎一瞬度東岡之桐嶺禮化士
於雙巒指遊龍與戲舞鏡三京而膽寒大屏之下寺曰
能仁四溪交流並轅天門舞羣鳳之垂天儼華陽之挺

立吞衆壑以朝宗拱萬山之環揖是雖奇峭無多焉固
已冠峰巒之業岌也羊腸回於六八俯在下之渠山羌
有鳥而有花悟達士之微言回巖之嶂隱若金城漢唐
道隔言訥天升惟隱顯之有時殆匪由於人力何先古
之神閔須後來之決別載旋余步溪澣攸行小柱華嚴
接阜連岡躡曾巖之鹿苑窮逶迤之淵泉屏彩翠之蒼
蔥聽天樂之喧闐仰大龍之懸水飛小雨之濛濛樂尊
者之優游得從容於下風指普明而回御探龍窟於飛

泉勒鞍馬而東之望奇峰之隱天觀音大士如住虛空
漠漠行雲誰尋舊蹤安禪之谷萬壑宗焉大筆書空一
柱擎天重樓峻傑以連薨雙闕當塗以相向天牕玲瓏
其四達自在慈悲而有像龍蜿蜒而歸洞離小湫而擁
曳發在定之熏聞鼻凹窪而出涕奮天然之鱗鱗回玄
造之頭顱諒茲山之多怪猶斯巖之匪如其闕伏龜重
樓雙峰其巘橐籥金柱石書摩虎口以東逝瞻石城而
近止訪淨名於丈室挹乳泉而一洗乃觀初月乃下虛

簾鮫人織素近在危簷閱靈峰之景物奇特亞於靈巖
犀黑暗而通天龍神遊而處潭五雲閣道應真矯矯谷
有靈珠歛生芝草入會賢之磴洞仰虛室之豁舒信真
如之可學烹乳茗而生葩金掌高呈亭亭空際訪三賢
而景行遂回車於真濟過胡公之棲宅遵靈運之迷途
造石室於東梁高禮佛之勤渠亭白若而下道窮二閣
於蕩陰忘散漫之岡巒蓀無隱於追尋北有白巖石谿
九折山橋跨馬巉巖影絕斯蓋水之奇也履芝田而種

玉煉爐火以飛霞羌仙人之不反厭時俗之囂譁過湖
坑於南閣栽土藏之孤高壯瀑水之滂流訪仙隱而遊
遨至窮途而輒哭等遊夢於華胥問山僧以前路固有
匪吾人之所如者殆不可以窮竟又安得而論諸至若
大洞神山仙靈是宅龍湫宴坐者諾矩羅之住世虎蹲
守護者蔓定僧之衣袂也至人遐造踐迹無同運無方
之玄化闡不二之宗風說法詎離於在定經行何間於
神通聞縮地於偷桃之客神飛於窺鏡之童龍丹成於

老父九二讖於元豐神屠履崖以如地聞思光燄以如
虹盜石而江波激怒觸鼻而涓泉不通者非人耳目之
所到而又烏得以議其污隆也惟茲山之神秀嗟近在
於人間曾跬步之不到乃窮人而上天化石橋於北閣
企斤竹之飛泉抑子晉未成於羽化而謝客不得擅於
遊山也今夫天下之山江東居最永嘉富甲於江外而
鴈山為大焉可為超羣而拔萃矣他山之秀么麼稱妍
陽臺十二秋浦九蓮詩文振古名字喧天僅得此山之

一丘一壑猶拳石之夫何足言所謂夷泰山而吞雲夢者惟鴈山之蕩為然

吳山賦

元 汪克寬

天沈寥而清曠兮金風淅淅而蕭森駕言馳騫於西浙
予縲余馬於虎林寓遐矚於此邦予爰陟吳山之高岑
苔梯石磴縈九折之委蛇兮躡巉巖而登臨躋罪鬼之
峻頂予眇竒嶽之嶽崙倚太虛而峭拔予嶮崿削方不
知其幾層根盤數千里而廣袤予周迴紆鬱於坤垠層

崖倚披而鵬翅于疊峰峻增而蚪鱗煙雲歛薄其萬狀
分日月蔽虧於夕晨草木暢茂而異香芬郁于靈竒恍
愴而升沉東望則海門之峯嶺于三島負鼇而聳負天
目渺以西至今萬石飛來而錯峙左西湖之瀟灑于匯
冰壺而清泚浙江右帶而混瀚于驚湍澎湃而澎湃紛
總總其上下兮餘艤舳舳相屬於千里下窺闌闌之行
迤于樓觀巍峩而疊起衢道衡縱而如畫于車馬駢闐
於九軌異珍輻輳以咸萃兮委南金而象齒大府屹立

於雄藩兮薨棟翬飛而麗美台星耿耿而旁燭子閣婆
琉球會同而至止挹佳氣而挂笏子偉翠屏之若倚緊
是山之鍾秀子肇玄黃之開闢顧名號之曷從始兮繇
泰伯文身而建國闔閭揮戈而駕楚子夫差奮矛而栖
越何西施之嬋媛吾以為好子賜屬鏤於婁直勾踐長
驅而沼吳子胥汎遺忠於潮汐銀屏雪屋衝突於山趾
兮存英雄之遺跡叢祠屹於崇岡子薦馨香於明德高
風稜稜而與此終古兮鎮坤輿以無極歌曰大塊流形

峙危阜兮句吳祚土錫兮守兮伍員鯁直忠肝剖兮命
祀千載怒潮吼兮聖人馭極一宇宙兮拳石海堧如培
塿兮雄藩重鎮永遐久兮蠻夷卉服拜稽首兮我皇撫
運億萬壽兮抽思作頌貽不朽兮

禹穴賦

有序

元
楊維禎

會稽山為南鎮見周職方至於今祀典不廢人以不見
禹貢為疑禹貢書治水起止自揚州止於震澤故會稽
與浙河皆不登載禹穴在會稽山見皇覽又見太史書

人以葬衣冠為疑考帝少康封庶子於會稽以奉守禹之祀則禹穴在會稽無疑也真誥以禹醉鍾山而仙去此異說之謬也又以穴藏禹治水祕策者尤謬故辨其說以為賦

追太史之東遊兮躡夏后之巡蹤過會稽之鉅鎮兮登宛委之神峰曰羣聖之所栖兮闢陽明之洞府問東巡之故陵予固已失其寔所繞古屋之雲氣予瞻袞冕之穹隆雷霆掣夫鐵鎖予梅之梁予已龍湫空山其無人

兮挂長松之落日枕荒草之芊眠兮栖專車之朽骨忽
白日其有爛子射五色之神晶窺神迹於一竇子眩太
陰之窈冥世以為衣冠之壙兮神書之竇也圭壁出乎
耕土兮彼巨石者不可扣也曰玉匱之發書兮遽淵淪
而天飛賴餘策以汨鴻子復韞櫝以閱之夫以四載之
跋履兮亦云行其無事錫玄圭以告成兮始龜文之來
瑞何誕者之夸毗兮異九疇而不經使穴書之不泄兮
夫豈汨陳其五行觀連天之巨石兮妙斧鑿之無痕南

筭削乎其玉立兮東娥接其雷奔塗峰歸其西北兮執
玉帛者萬億夫既遊而遂息兮吾又何疑乎窀穸縣祀
典之常尊兮石豈泐乎一拳妄鍾山之金酒子又何附
會於妖仙噫嘻南望蒼梧兮東上會稽九疑瀕洞子窆
石悽迷秦之望兮低徊悲沙丘子不西客有醺酒荒宮
而和之以歌曰稽之鎮兮南之邦紛萬國子來梯航若
有人兮東一方酌余菲子薦余芳舞大夏兮象德泳東
海子西江

海門山賦

以峭立如門終古無易為韻

唐周鉞

大壑天接雙山闕如作鎮而巍峩對峙象門而中外皆
虛圻萬仞於長霄共持神秀納八紘之積水開閉靈居
合沓龍蟠連延壁立懸崖嶄率而不動駭水喧騰而自
急每使盈虧之月向裏升沈能令蚤暮之潮由茲出入
故得周天柱作海門峻軋空碧高城混元奔疊浪而若
容車馬拔跳巖而似列藩垣常晴晝而纖露豁開大吞
江漢值陰霾而濃雲交翳暗鎖乾坤外布雄稜內施巖

嶠波聲相切以澎湃山狀並分而竦峭呀吳呻越總舟
楫之隄防發電轟雷轄魚龍之衝要岌岌崇崇橫西截
東風濤莫犯乎永固天地將齊乎不終況乎據是水德
鑿非禹功海若抱關於其側陽侯擊柝乎其中彼岱輿
因顛頊漂流太行為愚公遷易一則屹要道而徒在一
則滔洪波而何適未若是山也專百靈捍禦表羣聖光
宅吐晴虹以為楣森古木以成戟故能咽喉水府掩映
仙都長鯨透而謂呈魚鑰曉日照而疑啓金鋪以嶽而

言巡八州而何有以門而視指三海而則無異乎勢壓
坤維氣連淮浦作巨浸含弘之間為百谷委輸之戶所
以知開闢之玄功豈止亘億齡而窮萬古

遊越天門賦

元
任士林

柔兆之春二月既望任子與客汎舟遊於天門之表於
時颶母停颶慎郎卷霽飛滂不興淡漫無際始則拖長
綃偃帆腹裴回蚌蛤之洲睥睨鼃鼃之國少則掣掣洩
洩汎汎悠悠勦如雲逝蕩若漚浮浩不知蓬萊弱水之

在眸也洎余觀於漢裔渺一世之藟苴有石塘萬里鱗
鱗然隱波濤之下此殆祖龍氏之所鞭乎何其神也靈
洲瞥來絕島遙沒隆隆隱隱過大業天子之祠焉見其
君臣黼冕將帥鼓旗儼然牙檣錦纜銜尾而維也又何
其奇也昉二帝之所規悼生民之不幸身未死而變隨
顧英雄其何往於是停撓而思思窮而愁作噫嘻悲夫
客亦知夫天地之數廢興無常而孰執其綱蠻不必擅
觸之強荆不必暢凡之亡江上之寂寂又安知非人世

之揚揚客遂鼓枻而歌歌曰擊蘭漿兮叩桂舳訪田氏
子弔仲連數術不可久御兮驚力不可謂賢然乎然哉
吾烏計吾身之久邇余迺敲脚唱小海以和之客復擊
節順流而歸不知舟中之有明月也

何山賦

元
宇文公諒

環茗陽之諸山蔚金蓋兮深秀綠靡靡以旁圍青遙遙
而橫袤擅奇勝以覽觀紛應接於左右晉賢何楷於焉
讀書爰守是邦以遊以娛山因之以得姓人已往而遺

居是猶塹之有謝溪之有冉者乎觀其修林蔽日羣峭
摩天表金峰以前拱擁青塢而旁連步錦障兮雲麓聆
琴筑兮澗泉是雖地設實出天然靈祇獻瑞梵宇扃禪
閣流丹兮鳳翥瓦浮碧兮鴛聯華鯨鏗以響逸清磬發
而聲圓挂蒼猿於蘿磴棲白鶴於松煙若乃峰迴路轉
繡錯綺縟道場之勝境實相屬仰徹乎雲峰頻窺子幽
谷羅旂幢子杳靄韻簷鈴子斷續巖花子紛紅澗草兮
駭綠信造化之鍾秀實吳興之所獨是以梁則吳柳宗

則蘇仙或餞客以成詠或遊弔而綴篇或載於圖經之
舊或鑱於金石之堅悉班班而可考名與山而俱傳惟
我文昭倡導湖學振文鐸於東南羅佩衿之森若徹琅
音於冕旒構瓌材於棟桷封馬鬣於雲根山含輝而蘊
璞至於春秋致祭邦侯莅止祭文物之洋洋集衣冠之
濟濟黍稷馨香犧牲豐備嚴恭儼恪罔敢忽易奠餘分
胙乃復留憩或暢情於杯觴或寓意於山水垂遺典於
不刊實茲邦之盛事嗟夫水不在深子有龍即靈山不

在高兮有賢即名憫異端之害正遽遺葬於荒榛賴天道之好還喜家瓊之復青雖廢興之有數繇人心之本明雪污辱於既往思搗穴而犁庭揭體用之昭昭破昏蒙之冥冥庶安定之何麓猶宣尼之孔林揆愚生之貿貿深有慕乎芳馨讀遺書以私淑每拳拳而服膺登諸山以騁望增感慨於中心時不可以再得聊抒意於斯文

天目山賦

明
盧 枏

吳王夫差畋於具區之野王孫彌庸駢乘大夫申叔儀
御王望見天目之觀截薛塋塘曾凌雲撓弗鬱輪囷薄
乎中霄王命彌庸眡之對曰茲所謂靈祲也王曰靈祲
何如彌庸曰昔禹封九山含精蓄雲觸石吐氣炭漫龍
鱗蛇兮獨上剡子陀施紛紛紘紘莫知所以爾乃滋草
木旅禽獸爰僑怪填珍媁駢田隱爚萬物萌薈疇昔之
見無迺近是於時申叔儀進曰大王察彌庸所稱纖悛
叅離巨體塋戾可謂軒造化之渣滓而魯於盛德之符

契者矣且夫維揚之澳碩人焱起翩兮若威鳳苞彩翔
秋旻矯予若游龍凌倒景昇河津曉兮如日渥兮如雲
變化無方孰者為鄰伯啓毓於竒石傳說騎乎箕尾茲
山所以發精於哲耄作鎮於江汜若夫撫草渚之見禰
頰舌之談臣雖仇陋荒愬所不敢聞也王曰願為寡人
賦之叔儀曰唯唯惟吳后譽茲負壤兮頷女繁其岑隈
竦擁隋之陵嶽兮遼菟妙乎邛崃陟翠微以嬖珊兮徑
造天之崑崙踞虎豹而縣眇兮紇衆山之蔚壘礧嶠催

雛之踉蹌兮垣矍矍而掩襲駁沅沅以輞轢兮巨石嶄
嶄之獠翻南嶼屹嶮橫山嶢嶢靈巖玉華鬱律萃甞參
差波波揮援獠獲碧洞嶰澮窅谷礫谷訖訖沕沕
侏侏傾崎嶇窳嶇礧礧雕礧礧躡躡譚譚墮墮橫還蹠
蹠彳亍拉沓睢夷蹲鴟噦霍山下還眺層巒毓何煙煙
雲霞濛濛靖崑天霄濛濛寂寥飄飄澹澹乘風蕭蕭跼
如獸擾同若禽翺目不轉睎豔彩四暢滲淫襍襍莫能
形狀瀑布傍涌離潭濺濺龍湫荻浦靈溪硤踏渥乎混

流汜濫躋住蹶崎石觸唐嶙滴乎湓怒洶洶澎湫瀟瀟
濶濶狁齧騰塹浹滂解駭橫流紛霈潼沫高厲皤如白
馬偃紉羽蓋蜚僂呬喟汨汨去瀨憑陵碩壑砢投雷磕
硃硃潏隱砢轟訇澍澍洩洩漑漑漑漑枝詩蹇產漑
漑漂駛淼茫遠輸紆餘東逝永辭天墟漑沆漑漑安節
長浮隈濶演淪渚為後湖於是水蟲怪錯暴於洲渚鼃
鼃蟾諸鰕鰻鰵鯉鮫人淵客呀呬齧齧魂魂鱗鱗踏還
傍倅珍木敷榮璘璘叢生琅玕翠蒨珊瑚葩呈偃仰岐

盼中搖目精灌林茵歲葩華掩會糾枝隴房棟榭砢礪
化離蕤飢風流淹藹隨波澹沲婀娜莎芾浥彩翠霞吸
精沆瀣纖柯嚶吟颼瀏慷慨經寬隕抑或象笙籟尋變
馳險八風肺沛憑虛聽響使人心憤麝隸獮父狄蛙猓
然羆猓魑穀獬胡猓媛獬斷坐嘯裂眚互瞰驚透護略
窳歷半散超巉巖騰倚岸捷蒙茸懸絕澗羣獮狡健燦
兮若浮雲曾不可稱算周覽堂密陳隩淵陀芳草靡施
秋蘭薜蕪唐蒙留夷鳶尾胡繩楚蘅江離裕裕絢絢娒

舛萋萋肝蠻閭夢芬馥勢披鷗鵬羣遊登揚軀翼瞤視
嘲咋毳毳藻臆鵠子鶯黃鸝諸鷦鷯戴雋石鳥鷽斯蒼
鵠翬散陸離戲游山岳若夫琛希之賂金鑛涵扑雲精
燭光瓊支昭華璇英白珩藍田縹碧赤瑕流黃隈魄山
谷衍溢陂陲碕岸不枯林藪輝潤滋液澍漑光彩蟬煥
於是乎嶽靈擁時川后聯蜷百神焮爇僊僊燁燁泰乙
薦鴻祇御蜚廉翔蚩尤驚靡蜺旌馳翠輅飈旋電掣陽
嘘陰沍煜奕傑僥萃於豐處鳴秀斲奇亶肩顯老瓌琦

偉長雙顴日表方瞳星爛鮎姿雲裊宏懿儼雅倣儻要
貌徊翔於道德之林獵弋乎神明之囿覽觀九族之有
亡與閭閻之變態錫羨餘恤不逮繕橋梁虞婚配裕後
昆揚昭代金紫壁耀冠蓋雲屯擬跡萬石越彩八閩然
後肆志乎遊覽履巍巍涉漫漫坐穿石揮五絃舞白鶴
泣玄猿曳綠邛之杖踐赤玉之舄浩浩乎葛天氏之唱
偃佺負局羨門安期或命石髓或翳紫芝相狎於洪崖
之涯洪河清昌光鬱麒麟遊鳳凰至瑩英生黃龍戲泰

華砥礪衡霍增磧風雲交通鼓舞忭會信壯乎天目之
大享靈長於億萬歲

小山賦

唐太宗

何四序之交運轉三陽之暮時風辭暄而入暑樹替錦
而成帷想蓬瀛子靡覲望崑閬兮難期抗微山於綺砌
橫促嶺於丹墀啓一圍而建址崇數尺以成岬既無秀
峙之勢本乏雲霞之資承墜宇之殘露挂低空之斷絲
爾乃參差絕巘歲紆短逕風暫下而將飄煙纔高而不

暝寸中孤嶂連還斷尺裏重巒歇復正岫帶柳而合雙
睂石澄流兮分兩鏡爾其移芳植秀擢幹抽莖松新翠
薄桂小丹輕細影雜兮俱亂弱勢交兮共縈纔有力以
勝蝶本無心而引鶯半葉舒而巖暗一花散而峰明何
纖微之同景亦卑細以相成於是換浮歡於沉思賞輕
仁於勝地俯蟻垤而有餘仰終南而多媿非為固於九
折庶無虧於一簣聊夕翫而朝臨足據懷而蕩志

奉和御製小山賦

唐
徐充容

惟聖皇之馭寓鑒敗德於前規裁廣知以從狹抑高心
而就卑懼逸情之有泰欣靜慮於無為於時季春移序
初光入暑露溽池臺煙霏林籞睿情悵以無歡懷仁知
而延佇思寓賞以登臨非揆麗於茅宇殊華嶽之削成
異羅浮之移所爾其表翫宸衷故作離宮含仁自下帶
嶮非崇分上林之卉木點重巖之翠紅葉新抽而不樹
花散植而無叢雜當牕之帶柳交約砌之珪桐纖塵集
兮朝嶺峻宵露晞兮夕澗空影促圓峯三寸日聲低疊

嶂一尋風風輕兮拂蘭蕙日斜兮蔭階砌蝶留粉於巖
端蜂尋香於嶺際草臨波而側影石瑩流而倒勢雖蓬
瀛之蘊竒故未留於神睇彼崑閬之稱美詎有述於天
製豈若數簣之形託於掖庭俯依丹檻仰映朱楹恥巖
崖之鄙薄荷眺矚之恩榮期保終於一國奉天睠於千
齡

反小山賦

有序

金

趙秉文

無塵道人李天英家海壖得小山寶而字之名曰玄峰

寢作於花陰月竇之間適甚為賦閑閑老人笑曰是猶有所待也若知天壤間皆吾几格間一物又何待輦石於山函花於鼎之為適哉乃為賦反之

嗟石來前孰形子鑄匪山而拳玉立巉然匪溜而涓玉痕隱然天臺卧雲海濱藉煙幾代子寶幾姓子傳子入吾室吾以子賢瓊花晚醉璧月夕眠我家我林吾以子便我學我仕吾以子遷子豈吾友吾不子捐石不能對請以臆宣自我之石幾世幾年山非吾名石豈子妍聽

其兩忘其樂天也夫鏡中之象亦水中之象瓶中之泉
即潤下之泉吾豈謂寶顧陸之華不若山林皆吾之畫
圖悅秦巴之音不若禽鳥皆吾之管絃子以心為物役
智為衆緣不知無塵之桎梏於一峰之玄也空花悞大
夫之夢庭柏証祖師之禪無一物之悲我君其問諸屏
山之散仙

掖庭山賦

唐
許敬宗

覽先哲之英華遊舊典之場圃善逾遠而斯應德既昭

而必溥見漢屏於睢陽驗周藩於有魯表商丘而作鎮
規楚室而興宇亦何代其無人諒吾王之邁古於是命
世作弼含章挺英允文允武惟誠惟明聽甘棠之暇隙
想叢桂之幽情瞰浮雲而志遠瑩寒井而神清乃命僕
夫整駕山隅騰鳴笳於通谷擁飛蓋於高衢逍遙仁智
之境放曠道德之區造中天而式宴陵倒景而為娛星
懸珠網日對金鋪雲承綺棟霓縈繡櫺既而近矚玲瓏
遠眺溟濛隔翠微而半顯歷丹穴而纔通等玉京之仙

化侔銀闕之神功於時百卉敷榮六合清朗霞淡水而
川媚風飄林而澗響聳絕壁之千尋挂懸流之萬丈蔽
日月而孤峙吐雲霓而秀上循折坂而逶迤躡危嶠而
來往鑿離暉於石鏡法瑞露於雲掌爾其花藥芬披蹊
徑參差舒英冒渚擢幹臨崖乍莽蒼而橫植忽葑茸而
倒垂扇晨飈而裊裊含宿霧而猗猗陰町疇之毛羣哢
間關之羽族或相賀於薨棟或競馳於原陸駒食藿而
馴塲鶯含桃而出谷德澤加於飛走榮光周於草木日

云暮時稍闌暢神襟而體物紀盛跡以濡翰發詞林之
華藻瀉筆海之波瀾命小臣而並作賦大雅而承歡辭
曰芳園兮鬱鬱高岫兮峩峩君王兮遊豫軒蓋兮經過
花同林兮異彩鳥各嘯兮相和野獸鳴兮應鐘石山英
開兮間綺羅侍荆臺之入夢舞洛汭之凌波懸清暉於
日月同睂壽於山河

題山賦

唐
司空圖

爾吾髮以羣嬉兮乃恣狎於林壑窘世路之榛榛予匪

茲焉而焉託仰基矩之惟舊兮豈孱眇之彼度矧嶄紆
而還農兮亦靡勞於濬鑿壯神工之騁奇兮枉一峯而
中擢鬱鼇鼻而噓空兮湧佛螺而旁絡阜交蹠於艮隅
兮俯川塍而黼錯躋遺堞以仰眩兮洶瀑巔而雷薄腴
卉木以駢昌兮藹葩屏而麝幄滋彩綵以紛翔兮玩韶
鮮而戲濯覩羣物之遂性兮澹吾躬而斯樂矣殊道以
徇強兮喜夸鵬而跼蠓雖穴處而志揚兮邈軒肆於宏
廓借家國之未忘兮鄙榮伸而陋約鑒身明而自勗兮

行與息而靡忤

囚山賦

唐

柳宗元

楚越之郊環萬山兮勢騰踊夫波濤紛對迴合仰伏以
離迥兮若重壙之相褒爭生角逐上軼旁出兮其下圻
裂而為壕欣下頽以就順兮曾不畝平而又高沓雲雨
而漬厚土兮蒸鬱勃其腥臊陽不舒以擁隔兮羣陰沍
而為曹側耕危穫苟以食兮哀斯民之增勞積林麓以
為叢棘兮虎豹咆闐代狴牢之吠嗥余胡井智以管視

兮窮坎險其焉逃顧幽昧之罪加兮雖聖猶病夫嗷嗷
匪兇吾為桀兮匪豕吾為牢積十年莫吾省者兮增蔽
吾以蓬蒿聖日以理兮賢日以進誰使吾山之囚吾兮
滔滔

後囚山賦

宋 陳 造

柳先生蛻迹中朝落身南州即囚山而命賦寫曾次之
幽憂讀者哀之至今心為之悽怛而聲為之悲啾房陵
斗州窮巖絕隘裂石廩之一罅瞰千室而斯在層峰疊

嶂自蜀而東亘二千里此焉未沫嘗憑高而舒望取羣
愁之一快拖頑蒼綠寒碧兮了不究其所屈騰陵勃怒
崩轟閭沓植則困縈則帶蠹焉如邪銳焉如鑲馳萬馬
於曠莽翔羣龍於霏靄又似夫颶風之塵萬艘翻濤濶
於渤澥天雲若可手擘而日月為之隔閱嗟余與子胡
此焉仕案亦簿領庭亦卒史居無以泰吾心而遊無以
投吾趾時則誦柳先生之賦而知其有以也夫其猿顛
鳥仆窮號懾墮真狴犴之可駭也出不易入不可出

幽僻塊處荒傖癯民悍容而獐音日接乎前幾刻木之
與對也嵐昏滂朝黯掩瞠晦僵人骨而酸鼻亭午未已
乞乞者病壯者廢由漢暨唐王公貴人悖而罪劣可矜
貸母此來之昧也自我解裝歲律甫遷向行止之坎流
今押兇而鐵羶嗟若余子盤薄四年局不得歸欲語復
茹反諸已而靡愆袖長賦而見投慨今昔而潛然痛亂
山之見囚束寸步而莫前牢愁幽憤搗腸淪髓匪接摺
而踣頓不繼檻而掎止何高高之不仁而使我至於此

也蓋嘗繹子辭究諸理子之所以惻愴而自悼我之所
以感動而促感者君子有弗是也彼漢唐之逐臣例庸
房之廢徙則亦干國之憲不容自己吾與子來其始誰
使非以其窮途之絕援資身之無策博斗升以飽饑而
逋死如庸賈之走荒裔罷農之守境墻曾不暇計去取
於彼此也邪以吾校子又進退之異趨齒髮之懸殊環
索吾中槁涸而空無彼子柳子跼劉躡口豪韓與徒若
韋中立吳武陵之桀然方且望塵躡影蔑齊其驅彼其

一旦跼蹐於嵌巖阻之幽深宜其號鳴悼喑不能一朝以居予之蠢愚質之朴疎才之卑迂萬非時須而遽乃蟬頰悼中悄焉慘焉以賊和而傷生夫何為乎訊歸計於蟾蜍第圓缺之六七付古今於俯仰聽寒暑之更迭雖浩劫之悠長尚激矢之漂疾吾方左右圖史深居簡出揖勝友於南山斟春色於九室一不假犢背之書超然乎繫維繫轡之表非三花老仙孰其委悉子以吾言為何如余子謝之曰沈憂滯懣吾已失矣

羣玉山賦

以廓功峻登適
招外遊為韻

唐

喬潭

穆王與偓佺之倫為玉山之會乃御雲輦張華蓋飛龍
駸駸和鑾鐵鑕警清蹕傳虛籟忽兮超遙漫若天外於
是乎徙倚西望逶迤北遊梁弱水跨瀛洲析若木以為
珮采琅玕以為羞俾幽荒窮僻有車轍馬跡經銀臺而
右轉肆玉軼以東適停羽儀乎此中觀仙聖之圖籍既
而浮莽蕩躋峻增神靈儼其高會容衛紛其上騰若光
若滅賁然來登觀其亭亭太虛不可彌度石室靈造玉

堂天鑿寶牒有融仙經惟錯蕩青簡子綠字煥瑤緘子
金絡腹以蚪龍拂之鸞鶴為列真之策府亦太一之延
閣覽之而羣聖會同拔之而萬古昭廓且藏書為寶鎮
物為雄小石林之崖客陋玉樹之青蔥赫臚臚高崇崇
秘精義乎其中何必登隱弇拜崆峒挹方壺而訪道歷
秦望而為功者哉至如窮地之險極天之峻疊素九成
攢花萬仞非神轡之六駿孰能倏而驟進或歌之曰彼
天子子塵外鑣登靈臺兮意飄飄吾君得道兮異於是

不日求兮自逍遙以石渠為羣玉之處幸校文之見招

羣玉峯賦

以玉峰聳峭鮮
潔新明為韻

宋

田錫

昔穆王以閭苑希風宸遊縱目適玄圃之仙界悅靈峰
於羣玉乃顧謂祭公謀父曰斯山也拔厚地摩穹天含
珍蓄寶藏神宅仙軼銀臺之比峻踰太白之相鮮歷落
排空有處類巫山十二崖我倚漢有處如蓮峰五千朕
知卿之才者卿為朕而賦焉祭公乃拜手對敷揮豪應
詔心驚峭崿情忘聳峭或勞想於璘玢或馳神於竚窅

以爲一氣初判三才既生融而流者有四瀆之靈結而粹者有五嶽之名雖羅封而列爵謂生賢而誕英未若我傑出紫府高踰赤城虎踞龍盤聳圭璋而疎朗霜華雪彩皆琬琰之融明或孤而高或峭而絕或掩暎以相翼或蘊呀而半缺遠而望也則仙家青瑣含秀氣以玲瓏類而言之則春宴金盤點酥山而皎潔宜乎培塿玉壘奴隸圭峰藍關之英安足比於形勝荆谿之秀固亦陋其聲容若總而狀之則高者如飛歌者如恐背者如

遜向者如聳瑰姿竒態子信匪尋常戛翠摩青子可以
瞻奉祭公既筆不停綴辭妍若春賦詠既就箴規載伸
以為士林之羣藝圃之人有道有德有賢有仁琢磨材
能而益峻切磋名節而尤新儻一人之延納則多士之
來親穆王乃曰吾願益求賢哲比羣玉之嶙峋

沃焦山賦

唐
吳融

域中公子問於方外先生曰蓋聞水之大也下環乎地
上浮於空無象無邊夷猶洪濛百派千流皆歸於東何

巨溟之深也萬古能容何九州之高也不淪其中先生

曰渾沌死乾坤始東西傾川澤委帝乃慮海旁溢俾山

中峙復孕以火用銷其水此沃焦之為義真宰之玄旨

者也請言其狀也嶢乎萃乎赫曦乎翕翹乎陰陽熾炭

天地開鑪景風鼓吹赤帝規模成於妙有拔彼虛無處

冷能熱雖燔且濡於律則黃鍾取法在易則既濟相符

岝岬于壓海萬里鴻洞兮烘天一隅液馮夷軋天吳鱗

介既難以潛伏草木安得其芬敷巨靈不能擘畏其爛

手愚公不能移憚其焚軀靈漲疑竭大室若枯爾其水
之來也浩浩爭奔滔滔不住蹴嶽推阜跳天沃霧暘谷
無地扶桑失樹雷奔潮走雪飛沫聚吞吐造化浮沈朝
暮一歸墟之積積既久而還盈一尾閭之洶洶不供而
旋注苟彼不為煎熬何物當其委輸公子曰夫萬物之
是非也當務所見無矜所傳不見五嶽各司一邊蟠地
極天吐雲含煙玉石產其下豫章森其巔高高下下縣
縣聯聯方面是傳祀典是先故無事則備王者之巡遊

焉有事則為國家之關防焉彼沃焦者存邪亡邪不知
夫去中國幾千其說何適其功豈然先生曰古不可以
今論遠不可以近識至於先賢先聖有功有德或始火
化或始粒食或衣裳兆民或棟宇萬國其人豈見其道
何極但日用而不知固神化之難測抑又人之為意見
頻則不怪聞數則不驚只如跋烏玄兔迭代虧盈迅雷
烈風無形有聲北冰不泮南雨無晴方諸向月而水出
陽燧映日而火生鶴知半夜雞辨五更螟蛉化而蜾蠃

負洛鐘鳴而蜀山傾譚如詭妄驗乃彰明儻非目擊皆
必力爭如沃焦者茫茫靄靄存於物外屹溟漲以獨立
無丘陵之相帶何地能勝惟天粗蓋堯災是弭禹功是
賴但以遠而不見貴以近而不見大何異乎曾參冠百
行之首出四科而不載姬旦有再造之功為三監之相
害有以見深藏若虛明道若昧只如高稱日觀靈號天
孫曾瞻所重充鎮攸尊能攻善惡業召精魂何盜跖壽
而幸何顏回夭而寃何富慶何貧原靈獸出何遭羈縻

之困海鳥來何獲鐘鼓之喧觀其倒置孰為司存又如
太華隱嶙上五千仞碧蓮若插高掌如奮然而設關太
束為城太峻苟一夫可守四塞可鎮終使險易恃而固
易憑而令驕易生而荒易徇懼則能安逸則成釁又如
嵐浮紫蓋秀擢朱陵北渚下壓南箕上承然而聚鬱蒸
限嚴凝鴈不可度人何以登其禍聖賢也則帝舜之遊
不返昭王之死無憑其殃忠諫也靈均有葬魚之痛賈
誼有占鵬之徵是非不辨正直何稱徒聞金簡玉書以

為覲九向九背而自矜又如幽并之墟畢昴之位岵崑
直上磊落相次然而藏趙符於上成無恤之不義產燕
壁於中假慕容之神器大蛇蜿蜒兩頭何異嘉穀疑疑
五穫何利旁扶跋扈之黨坐索彤弓之賜胡不懲革而
令馴致又如據天地之中央潤河洛之流光岵亭壁立
壓疊屏張而能降神表瑞呼歲呈祥控臨諸夏標準四
方若乃陳蕃竇武一時忠良為國除害其謀乃臧不獲
天助翻為賊戕劉聰劉曜恣意焚傷衣冠草莽宮闕犬

羊俯折地軸仰絕乾綱漢陽九以遽畢晉南渡而尋亡
曾何固護自倚青蒼月裏開宮但容童子雲中捻管唯
引鳳皇吁其拙哉彼五嶽者長未一分短以盈尺論名
則大責實何益封公封王用珪用璧邃宇崇館朱殷粉
白然識者視之何異沐猴而冠牽牛負輓者邪其次則
有非方非嶽亦怪亦神崑崙則樹珠田芝蓬萊則闕金
臺銀周王迷之於轍迹漢帝感之以禮裡荆山美玉獻
不遇君隴山鸚鵡語或陷人嶰谷有竹悵舒不均嶧陽

有桐清濁強分姑射何靈如冰如雪巫陽何感為雨為
雲怪山何怪飛來至越慶山何慶湧出於秦若然則遠
者近者大者小者如沃焦之功實冠於天下何以名邪
至於南面魏巍安尊定卑建邦設都來蠻走夷其為武
也有干戚鈇鉞其為文也有俎豆罇彝齊紈越絮暖必
如斯周禾溫麥飽必以時胎化卵育手捉足馳其奉生
也有歌鐘管籥其事死也有棺槨幌帷詒子詒孫固本
崇基苟懷襄之不止皆墊溺以何之若然者不惟九土

潰而全墮抑亦三光蕩而崩離則堯舜禹湯之道沒不
傳矣周孔楊孟之文又安存斯況乃上無灌木誘良工
之斤鑿下無靈鼈招巨人之釣索不栖翠羽飾綺被之
彩錯不孕明珠供魏車之照灼不滋金鐵起兵交惡不
穴鱷鯨吞舟恣虐吉凶莫知威福寧作誰銜肝鬻誰藏
冥寞所以貞珉翠琰却絕罔錄桂湯蘭肴何嘗約畧固
不復邀物以白犬白雞媚人以靈草靈藥但超世以崔
嵬為普天之銷鑠於是公子愕然如失起而謝曰儵忽

之神能鑿人耳目俞盧之術善治人膏肓向者聞衆人之論浩然若涉津之無梁今也聞吾子之論燿然若披雲霧而覩太陽恨不能凌風雲乘混茫快意極觀勒銘其旁噫有名之祀所在感彰至於山魅射影水弩為創鴟夷鼓怒耕父激揚皆霑沃酹不乏馨香何茲山也橫絕於萬代不遇於百王將無時如孔子豈獨行於務光近者泰階未平四郊多壘貳負尚活三苗未死水仙則多陷齊人米賊則半驅妖鬼室散機杼田拋耒耜郎官

困採橡於野將卒貧鬻薪於市霧足妖興雲多陣起既
走羣望猶懸帝社豈褒崇之漏彼致災害之如此方今
封有功而爵有德小不遺而大寧弛蓋九重深執事者
未聞於天子

沃焦山賦二

以蕩熱翻空此
馬銷鑊為韻

唐

吳

融

海之大也吞乎百川百川不停也海將溢焉伊元化之
相制屹崇山之暗然不知乎何代凝結沈潛積熱廣陂
阨高截嶠燄止不死煙生莫絕瞳矐兮想二氣之爐中

烈沸涌兮疑九州之鼎下熱當長鯨之鼓跳此歛爾以
潛銷雖巨鼇之噴躍亦倏然而盡鑠滲若一空呀如四
涸得非火井通其腹且孰問其穿鑿當是燭龍蟠其根
又誰覩其照灼但耗溟渤自橫寥廓莫不屹屹崇崇燭
虛燥空向曙而晴霞助赫連宵而陰火相烘如欲以煨
鮫室災龍宮雨露既難以澤草木安得而豐遂使乘槎
之人莫敢沿洄其側銜石之鳥無因栖息於中是知陰
陽之變也本自相形動靜之用也歸於相養苟喬岫之

無作則柔祇而必蕩若然者堯之水不止乎九年之多
禹之功難均乎四海之廣彼稱神稱仙者有十洲之繁
封公封王者有五嶽之尊縹緲而雲霓自燦崢嶸而日
月爭翻徒充覆載莫補乾坤曾未如千仞獨高衆流
委非煎熬之不急則墊溺而何弭所在雖遠厥功難弛
有能光祀典於吾唐宜褒崇於此

瀛洲賦

有序

明
羅喻義

瀛洲之山遠在東海粵若稽古圖牒所陳洲名者十山

名者五壺名者三瀛皆與焉亦猶冀方總九州泰岱宗
五嶽矣顧跡涉怪迂匪賦何顯匪徵何信是用借漢為
喻終之以雅云耳辭曰

赤堊降青崔下武皇作開金馬東方滑稽相如文雅有
詔問朔積水焉極孰知其坻神洲有十疇者神奇拙子
祕思騁子妍辭遠想冥摻為朕賦之朔拜稽首丕惟曰
於戲休茲豈不異哉八方之外巨海之埃立都紫府玉
樓金臺遵渚則有青丘鳳麟陟嶽則有方丈蓬萊何衆

與之競奇而一壺之玄勝雋八洲而先鳴殿四山而後
勁於稽其位厥惟東海西直會稽七十萬里地傳木公
則諸真之祕館焉方乘震帝則羣山之隩墟焉昔余望
於遠海睇彼蓬瀛登於衡山刻石作銘曰寶雲生於露
壇祥風起於月館望三壺如盈尺覽八紘如帶綰余夙
蘊此奇尚予東入海而徜徉飲黃露於玄天兮飴丹霞
以為漿朝發軔於朱陵兮夕余屆於扶桑維彼瀛之巖
業兮羌上廣中狹而下方類太華之削成兮宛在水之

中央展其為大也恍其為怪也懍懍不可為容閔倏不
可為槩也爾乃六龍扶日而上升五鬣冠山而番休人
民隸籍而皆仙禽獸彌望而如茶山川髣髴乎中國風
俗依稀乎勾吳神芝煜煜而擢秀仙草油油而芳粦乃
有玉石千尋魁然其阜下吐醴泉味甘如酒數升輒醉
後天並壽既旨且多酣飲則那余竊樂此據地而歌之
歌曰天清地曠渺難望冷天蕩蕩浩蒼蒼百齡暫寄何
許長請為婆娑玉石傍酌泉如醴行羽觴令君長生壽

而臧此中玄超非醉鄉黃金作闕芝產房千秋萬歲樂
未央據地未起載歌玉醴歌曰玉醴方潔甘且清有道
服者得長生挹彼注茲可數升陶然常作醉中醒念茲
綢繆樂不淫何當漂泊從伊人惟時相如大夫有睟其
容執簡而進曰吁咈哉異乎所聞方今聖明在宥化洽
隱淪西有太液三山東有玉堂璧門所謂瀛洲即此其
真矣何必求之方外而問諸水濱朔言非是臣請為亂
以正厥事亂曰太液予蓬瀛玉堂予璧門山有木兮水

有連匪集仙子而集賢羣龍子躍惕翼君王子永世

江上之山賦

梁江淹

潺湲潏溶子楚水而吳江刻畫嶄峩兮雲山而碧峰挂
青蘿子萬仞豎丹石子百重嵯峨子巖壑如斲兮如削
嵒嵒子尖出巖岬子空鑿波潮兮吐納嵒峰兮積沓鰐
鰕子赤尾鼃鼃兮匝匝見紅草之交生眺碧樹之四合
草自然而千花樹無情而百色嗟世道之異茲牽憂恚
而來逼惟鑪炭於片景抱絲緒於一息每意遠而生短

恒輪平而路仄信懸天子竊昧豈繫命於才力既羣龍
之咸疑焉衆狀之所極俗逐事而變化心應物而迴旋
既歎翕其未悟亦緯繡而已遷伊人壽兮幾何譬流星
之隕天悵日暮予吾有念臨江上之斷山雖不敏而無
操願從蘭芬與玉堅亂曰折芙蓉予蔽日冀以盪夫憂
心不共愛此氣質何獨嗟乎景沈

林表吳岫微賦

以題
為韻

唐

冷朝陽

楚江之陰巖壑重深參差遠岫掩映遙林帶殘霞之隱

隱含暮景之沉沉聳孤峯之萬仞擢喬木於千尋仰之
彌高倚青冥而直上瞻之彌遠凝黛色而傍臨牕微明
而可見雲出沒而無心微雨新晴陽烏乍曉芊芊芳樹
歷歷飛鳥森羅廣澤之間半出重林之表天高地遠混
煙靄而雖微虎踞龍盤等衡巫而不小形標迴漢勢壓
全吳衆鳥所託羣仙所趨林隔岫而相映岫依林以相
扶幽蘭所生知其芳矣仁者所樂不亦悅乎春思感於
春林遠情馳於遠岫心悠悠以遐想色遥遥而層構度

材任土挺翹楚而敷榮蘊玉藏珍分嶽壑而增秀信乾
坤之覆載承雨露之繁茂當峻極於長空豈蔽虧於側
陋蘭青青兮雨霏霏望鄉路予吳山微折芳懷遠予送
將歸桂枝片玉子生光輝

牕中列遠岫賦

以山遠而見如
在諸掌為韻

唐

張仲素

仁者靜而自閒高其居而閑其關爰開牕以列岫若施
障而圖山邈彼黛巘當於其間至若虛牖洞開連峯向
晚雲無心而迴出鳥厲翼而孤返初疑鏡裏覺萬象之

俱深又似壺中見三山之尚遠洎如雨歇原野風開薄
帷天道不窺而自見山光遙麗而增思謝守臨齋以觀
詠之不足陶公開卷則知室是遠而若薜蘿之在眼方
坐嘯而搯頤杳杳雲峰既自中而翫矣蒼蒼海嶠亦孔
昭而見之况復彩翠之容朝昏是變將避俗以無悶殊
近知而守見簾光乍入增松雪之微明砌竹旁垂助林
巒之蔥蒨夫其牕也或飾之以青瑣交之以綺疏想取
榮於爾室非助境於吾廬鑿垣而疊嶂遙列寓目而幽

襟必舒偶琴酒之樂只泯色空之豁如且彼植木翫芳
者有時而改累土為山者有時而始曷若曲肱隱几事
幽功倍垂碧紗而嵐氣共凝卷宿霧而翠屏常在是知
事有親而逾失遠而匪疎徇利爭先之徒固難知也逃
名小隱之士或近沽諸亦何必尋赤城之標究蓮峰之
掌彼垂堂而是冒此自牖而可賞山中人子誠不在於
獨往

御定歷代賦彙卷二十二

謹案第二頁前三行近智者以守見而不之按文
選無者字

第十九頁後一行山狀並分而疎峭刊本分訛兮
又呀吳呻越刊本呻訛伸並據文苑英華改

第四十一頁後五行皆需沃酹刊本酹訛酹今改



總校官庶吉士 臣張能照
校對官編修 臣閔惇大
騰錄監生 臣楊仁基

欽定四庫全書薈要

集部

御定歷代賦彙卷二十三

御定歷代賦彙卷二十三

地理

石假山賦

元任士林

天地之間境足以移人人移之而飄忽物足以致人人
或可以致物此操蛇之神所以對愚公而駭魃也抱然
犀之餘焦覽具區於一目黯波臣之晝泣開水府之羣
玉媧煉之遺禹餘之劓隕而星芒結而水沫耽枯影之

申徒粲黃鉞之沈璧何其奇也爾則鐵繩千尋魚貫萬
夫水厭人而不悔鞭有石兮疾驅蹲者踞者立者蹶者
銛者剡者獨者附者似鼻似口似蹄似股似蟠而蚪似
關而虎雲幻狀兮孤凝鳥停思兮欲翥神剡鬼削關面
呈趺出濠濮於華林納乾坤於一壺九華曉立五老前
揖謁賜履之登躋養腫神於翠兀誰歟抱琴徒倚而吟
樂山之樂萬古此心草華未滋挹其仁也霞吞霧吐擘
其神也厚載靜容德我則也霏翠排青色我覲也真趣

已亡枯立堂堂子胡樂之以偽翼狂主人曰嘻不毛之
珍天不怪取終日之介置我丹府誓言不移容揖而去

石賦

陳
張正見

連山蔽虧巨石欽崎上興雲而蔚蒼下激水而推移舒
丹霞於九折混白露於三危鎮方城於濮水固天闕於
湯池開五嶽之靈圖集九老之僊都韜神弓於射的產
利劍於昆吾魚躍湘鄉之水鴈浮平固之湖墮山鵲之
金印碎驪龍之寶珠掩藹披衣氤氲翠微精衛取而填

海天孫用以支機隨西王而不落傍東武而俱飛

石賦

唐李邕

代有遠遊子植杖大野周目層巖覩巨石而歎曰茲盤
礴也可用武而轉乎茲峭峙也可騰趯而登乎觀其凌
雲插峰隱霄橫嶂峻削標表汗漫儀狀劃鎮地以周博
崛戴天而雄壯默玄雲之暮起艷丹霞之朝上若使矗
布長城竊睨高壁遏西戎而分塞截東胡而度磧張九
州之地險威四夷之天隔固可以眇絕驕子遐阻勅敵

歸華夏之甲士却邊荒之羽檄別有列在王庭地當文
砌疑貞琬之粉澤豔重錦之光麗承聽政之梁柱納進
賢之階陞匪徒夾植桃李因芳蒞蕙降神女之徜徉拂
仙衣之容曳若乃苔蘚剝落雨露淋漓冰碧藜曜繪畫
紛披不邀代之所貴不欲人之見知罔懷金而則異曷
剖玉而方奇至若危堞孤援懸門禦衝出陣摧鶴乘城
起龍礮與矢而飛雨磁當途而列墉金鼓為之沮氣戈
矛為之輟鋒借如奕秋沉思蜀相興圖秉節制以全勝

縱刼殺以論都鄙宗緘之謬識嘉禹鑿之神模落五星
而多憎坐千人而不孤惟磨礱之所取任圓方之自殊
支空留於織室編尚想於兵符鳥何恨而填海山何言
而望夫徒以貞者不黷堅者可久卧如羊於山野蹲似
虎於林藪知作鼓之希聲信為人之無偶梁架海以東
注鎮臨江而南守庶投水而克成將補天而何有豈獨
砥礪利器盤踞真王鏃來肅慎門通越裳屹特立以興
主駕能言以發祥邇開蓮子表華遠倚劍子疏梁保茲

城而永固結彼交而不忘何止藏書入室勒篆離經翕
湘川之飛燕伏昆池之駭鯨膏久服而顏駐碑一觀而
涕零豈如扣角匡坐且悲歌於白水尋山小住止危途
於翠屏而已哉

古石賦

唐
鄭惟忠

博望侯周流天下歷覽山川尋長河於異域得美石而
獻焉漢武帝未之奇也東方朔見而喟然曰此石英輝
潤密秀色明爛舊枕昆吾之谿曾臨歸美之岸玉雉飛

而激矢金雞鳴而縱彈至如天台始裂地乳初分丹青
孕彩隱起成文盈尺則內含明月膚寸則外吐浮雲別
有兩楹分竦雙闕相向依依識啓母之形亭亭表望夫
之狀鼓迎桴而若動帆映舟而似颺此並流膏曲澗滴
髓危峯據谷成虎臨池作龍鋪英九節連葉千重若乃
泗水之上岐山之側撫之則磬動奇音被之則錦開新
色陴石見而驚駭師涓聞而歎息於是琢磨成狀雕瑩
生輝似龜則負圖盤峙如鵲則緘印騫飛在地者佳人

擣練登天者織女支機及其火烈崑墟星流宋國被隕
形碎遭焚影黑碑沉郢路之東柱折陽關之北昔之開
壇竹聳抱劔松抽礎應山雲之潤橋通海水之流柳谷
岸崩之馬鬱林泥落之牛莫不歲月彫訛丘陵蕪沒顛
墜坑穽枕倚巖窟據洞口而差莪出泉心而磳硤徒見
新排理圻舊感文迴圓分者電散方裂者冰開既藏瑕
而被蘚又抱穴以侵苔豈如寫鏡能明磨鋒可利擊拊
充帝庭之樂闕和覩王府之器總五色而補天含九光

而鎮地者矣辭未畢帝乃顧而言曰楚王見璞棄之山
阿不有卞氏其如玉何抽琴命操為古石之歌歌曰江
東藏瑞簡濟北蘊兵書若非平固湖中鴈定是昆明池
裏魚歌響既終神儀有懌左右驚視符彩傍射使玉人
而攻之果得連城之璧

禎石賦

以素質立字篆
隸相參為韻

唐

薛存誠

上帝乃眷下顧豐我皇祚產禎石以報德約遠人以遐
赴外輝煥以發章內清明而含素方圓冰潔篆隸星布

五千符聖歷之長一九合太陽之數瑩然非追琢所及
忽爾若神靈來附考乎文也知諸受命之期徵乎石焉
示此維城之固且夫文旌乎寶石堅乎質垂本根以繁
茂作元后之貞吉驗符而天命有歸貽慶而孫謀莫失
方洛書以自來狀河圖以負出懿夫皦彩發鮮隱起成
妍質非工斲字乃神鑄移篆文於玉璽之上取隸則於
銅棺之前紛鳥迹以屈漢若飛騰而在泉帝拜昌言慶
寶延于卜代名傳聖運功何異於補天苟不思而來暨

恭承眷于上玄信乎瑞以勤致彰乎天賜其為后也貴乎無得而稱其為石也下乃不求而致豈比夫渭濱之璜兮空言佐命峴首之碑兮永沉文字孰若我垂吉祚於當時演昌期於後嗣且夫文可嘉而不可卷石可固而不可轉題八角而爾乃增輝刻九言而吾斯盡善宜子孫之蟄蟄得先銜於隸篆太宗勞謙垂制虔告上帝伊連被而莫紀自高祖而流裔其石也為遐玉之祥惟孤也實先君之系誠降慶之所致敢欺紿於輿隸於是

公卿列辟劔佩鏘鏘聯趨詣石載拜稱觴斯萬人之有
慶表二聖之重光不然何炫發於石玉侔其相瑩煌無
點璀璨有章帝曰祖考之德惟覃股肱之能以參故天
錫之罔替諒不穀而何堪

瑞石賦有序

明潘桂

天啓丁卯京口載罹凶荒天青地孽割我稼穡萬姓罄
罄無所寄命圖山之陰天產石粉其色白錯者紅其味
甘其質膩咀之馨其液可搏不礲餒者充饑者塞厄者

鼓而立山去城百里而近余輿而觀之擔者溢阡采者
闕于丘陟間趾可拘也嗟夫天地之大奇出不窮理無
而事臻氣鼓而物奪自非覩記之餘千載之後安知不
與補天之事同疑其悠謬哉賦曰

天符臻地寶植岷巖闢坤珍出補天佐嶽錫爾靈石爾
其為質也靡瓊委玉凝肪截脂鮮飛豔雪華曜朝曦光
逾雲母色麗瑤芝釋之叟叟初之靡靡無餒無敗不礪
不礪埒華山之玉屑方梁父之銀泥豈石廩之宛在抑

地乳之潛滋宜充虛而解戰爰塞餒而救饑繫生民之
百需兮食為之天天以六氣下凝兮成五味之華鮮麗
五行於百穀兮固物始而民先勛水耕而火耨兮竭胼
胝以祈年美穗岐而表瑞兮抑雨粟而徵賢曷埒此自
然之食兮協幽贊於重玄况凶年之屢稼兮悲地財之
貧破何辜今之人兮罄天地而一餓閔鼠空而穀盡兮
氣廉廉而消墮冢累累以魂新兮或流離而遷摶遺珍
符之大垂兮感神貺之潛呈噓枯以續喘兮拔瘁而為

榮黃吻怡而含哺兮鮐背鼓舞而取盈走遐邇以如鶩
兮咸廢耘以輟耕筐承而車任兮徑隘而衢爭惠遺黎
非小補兮嗣嘉穀於秋成夫孰賁此靈休兮匪天工其
奚及夫既秉好生之恒德兮曷不祐此垂成之粒割之
糈而錫之餐兮夫孰不歌夫帝力固造物之多奇兮幻
生成而不測系曰石為氣核堅不可奪兮氣之所鼓性
為之脫兮含功牧生地之奇祿兮畫地為餅庶幾果腹
兮

石鏡賦

以清光內朗稟之媚然為韻

唐李程

惟石之貞惟鏡之清鏡因石以為異石假鏡而為名其在石焉肇自一拳之質其為鏡也非因百鍊之精不資磨瑩而冰淨詎假雕鐫而砥平徒美夫孕清瑩含彩綴粲玉質以皎晶蓄霜華而明媚匪因人力其成也何時倬彼神功其來也奚自凝輝炯炯散彩洋洋既不勞乎鎔範亦無失於圓方輝映空巖恒舞山雞之影色澄清夜寧慙玉兔之光伊鑒物之必審信自然之所稟彼虛

受而不遺同至道之無私既不限於遐邇豈有差於毫釐深山之中誰辨藏冰之處幽谷之際寧分抵璧之時況剛直其體清貞自持恒發輝山之色常含韞玉之姿懷寧一之心不可轉也處閨寂之地誰其尸之當六合之清爽澄素輝之潔朗可以坐致於雲霄可以立分於魍魎知遠之邇視山岳之在目以小觀大覽江湖如指掌且鏡之為物也淨石之為義也堅既守質以固矣亦騰光而皓然朗鑒之前皆願呈其肝膽委照之下終願

辨乎媿妍故能無微不燭無物不載彼三光與萬類莫
不形乎其內也哉

落星石賦

唐崔沔

元氣初變有形既闢稟清明之表者騰為星辰受重濁
之資者降為土石肇經綸於邃古蓋常久而不易詭哉
靈物爰始混成叅夫玄象麗於太清彼在天也何譴奄
淪落於邊城其在地也何幸復推遷於上京爾其蘭臺
廣廡芸閣修除飛軒廊落邃宇崇虛芳草旖旎珍木扶

疎邇九重之宮闕藏萬古之圖書地禁務簡政和禮舒
貞而不黷其清有餘意棲閒之得所形變化其焉如徒
觀其隱淪晶昭蓄縮光芒體硨磲以難動氣埋冥而不
揚擬於規矩既不合於圓方徵其彩飾又無復於玄黃
匪處匪出不識於行藏匪榮匪悴不達於炎涼夫其靜
也何必徐生百祥夫其重也何必能鎮百殃庶永終而
知弊蓋抱璞而襲常彼無用也亦至人之所謂允臧

昆明池石鯨賦

唐
李子卿

漢武帝將恢厥功闢厥土使近必伏遠必取乃象滇河
以為池法昆明而教武於是水物備石鯨吐茸鱗鏤甲
欲動於漣漪掉尾連鬣必隨於風雨殘文沙白古色苔
蒼若噴沫而生浪狀銜珠而有光質惟其堅豈有時而
泐感則斯應蓋動惟其常方將協靈德薦禎祥豈泥沉
而沙卧與地久而天長者哉至若漢苑風霽秦渚流春
輕搖澹泞稍動淵淪載沉載浮百尺且窺於頌首若明
若滅兩崖猶認於文鱗對牛女而光動映樓船而色新

誇大豈慙於海客遇屯空笑於波臣及乎雷隱南山雲
生北斗鼓怒波擊崩騰水走勢則洶洶有類陽侯之振
聲乃競競宛是蒲牢之吼若此則非不知靈之所憑神
之所有者也且石之為質也磨而不磷魚之為物也動
而必順豈比夫為犀蜀郡浦際空沉作燕湘川雨中方
振色映乎崖渚性合乎風雷非任子之釣得儻琴高之
御來幸見處於河漢亦何辭於劫灰客有感而言曰今
失流無虞鏗鐘何託請為不轉之志以就觀濠之樂儻

南溟之可圖吾固知夫後時之可以潛躍也

魚龍石賦

以一川中石無不似之為韻

唐王 棨

隴山下沂水中有石類魚龍之狀成形匪追琢之功半
隱齋淪若噉喁而斯在餘依磧礫將蟠蟄以攸同嘉夫
地出貞姿天成詭質雖駉駉之勢可類而跳獸之規莫
匹厥象有二其堅惟一水清見處如欣得水之秋雲起
觸時稍叶名雲之日豈非自從凝結有此規模既異織
女還非望夫或似罷江湖之游泳又如收雲雨之虛無

徒使漁人川上而幾迴顧盼仍令秦氏路旁而終日踟
躕蓋以磊磊漸分磷磷酷似溜穿而吮沫無別苔駁而
成章可擬曾經飲羽若銜索以斯存或用紀功疑負圖
而載止由是密聚鱗次孤標介然設頽尾於五色認胡
髯于一拳初驚獺祭於地復謂見化於川覩岸草以旁
生不殊在藻遇春流而乍沒又若潛淵既將轉以揚鬚
亦因泐而無首比岫居而苟可於泥蟠兮曷不中猶蘊
玉尚含呂望之璜誰取支機已在葉公之牖造化難知

雕鐫者誰何莓苔之古色有鱗鬣之奇姿謂湘水之燕
且殊寧俟飛也與金華之羊自別何勞叱之既表玄功
永存靈蹟映一水之晴綠對羣峰之暮碧彼結網垂綸
之士與攀髯採珠之客或命駕而西遊試迴眸於此石

仙石靈臺賦

唐關名

惟神化之所感何禎祥而必臻位將天而同德天與日
而共新百靈扶於三善萬象資乎一人美以英聲遠被
嘉貺必陳於是秘其迹則如畫如隱圖其文則匪鐫匪

刻屈若絲縈舒同髮直彩非因染辭無假飾雖真錄之
可觀固神功之靡測若乃烟消字發苔落文生映月波
起含日金明彰八千之縣祚著三代之珍名或鸞迴而
鳳轉乍雲點而霜橫法兼篆籀體被形聲信天筆之攸
假實神翰之所成至如桂影宵臨星光夜燭分若珠解
連同瓊續映朝霞以散錦流夕露以垂玉紀三皇之故
事包五代之遺躅足使濁河龍泳清洛龜沈既超前而
冠後亦挾古而光今所以管絃流韻鐘石凝音豈獨妙

符至理固亦道叶乾心總羣瑞以考徵實表盛乎貞紀
騰茂實於千載激清流乎萬祀玄象煥以呈祥靈山鬱
以效祉明皇基之永固與天地乎終始嗟微臣之菲薄
屬欽明於暮齒望天闕以長謠情願戀其何已也

溜穿石賦

以能以甚柔而
攻至堅為韻

唐趙蕃

山溜泠然激幽石而濺濺恒羃歷以迸集忽嵌空而下
穿介若自持謂稟靈而利物呀而中斷見積小以摧堅
且其輕重異源剛柔殊類嘉洞出而無朕知累功而有

自貫白雲之幽抱滴滴方來破蒼苔之古痕泠泠斯至
崎嶇莫狀激射無窮逗跳沫以居內洩涓流而在中日
就月將必漸然而爭赴因微方著殊易者之先攻原乎
厥性既柔其平如砥因滴瀝以成象若洞澈而虛已注
而匪竭歎追琢之莫加協乃有時顧堅貞而何以下漱
而玉中間似冰謂雕以為樽窪而無當疑鑿而成磴豁
爾非憑然則引深邃洞觚稜諒在物而靡及非自微而
不能由是異類相推於斯何甚蒙兮莫奪堅然自稟清

光亂灑初熠熠以穿菱素彩頻垂每熒熒而透錦偉夫
炯若方絜於焉注茲或零落以將盡竟連環而不遺依
依未通導神泉之靡息一一將徹聽鳴玉之遠而故可
以託質悠悠於山之幽載吐潛液靜如冥搜滴盤礴之
間通茲餘潤挺剛克之際分乎至柔諒成功之不遠庶
積習之可求

溜穿石賦

以能以甚柔而
攻至堅為韻

唐
楊弘貞

溜可穿石柔能陷堅因依而上下相遇悠久而貞剛失

全始則泠泠觸泓澄而或躍既而決決宵洞達而旁穿
一道中透孤光下懸何載馳之不息終漸靡之使然觀
夫習坎能通柔虛漸至虹挂空而飲井星曳練而投地
徵老聃之說柔弱勝於剛強驗夫子之文積善由乎馴
致當其涓涓無已皓皓未通若蘄巖之見拒能激射以
相攻既漱盪以探奧遂深沉而鑿空下漱花浮似出桃
源之外乘流魚躍如辭丙穴之中言念其美因詳所以
石雖堅而有崖溜雖柔而不止進寸退尺常一以貫之

日往月來則就其深矣克諧潤下之道實契靈長之理
想夫經始之時人莫知之笑我者謂量力而徒爾見機
者料成功之遠而既知難而不退長引彼而注茲是能
卒獲其求何傷守柔細滴瀝以成響大逶迤而若抽在
彼一拳同玉卮之無當經乎五色狀銀漢之分流其空
可翫其義可稟庶求福之不回思進身而去甚彼以水
投石于嗟莫承摧鋒飲羽誰謂難能曷若挫銳而功著
積微而道弘妙哉斯賦之旨惟執柔而有恒

望夫化為石賦

以望遠思深質
隨神變為韻

唐

白行簡

至堅者石最靈者人何精誠之所感忽變化而如神離
思無窮已極傷春之目貞心彌固俄成可轉之身原夫
念遠增懷憑高流盼心搖搖而有待目眇眇而不見絲
蘿無託難立節以自持金石比堅故推誠而遂變徒觀
夫其形未泐其怨則深介然而凝類夫啓母之狀確乎
不拔堅於王霸之心口也不言腹兮則實形落落以孤
立勢亭亭而迥出化輕褻於五色獨認羅衣變纖手於

一拳已迷紈質矧乎石以表其貞變以彰其異結千里
之怨望含萬里之幽思綠雲朝觸拂我我之髻鬟微雨
暮霑灑漣漣之珠淚雜霜華於臉粉脫苔點於眉翠昔
居人代雖云賦命在天今化山椒可謂成形於地於是
感其事察其宜採靡蕪之芳生不相見化芙蓉之質死
不相隨冀同穴於冥漠成終天之別離則知行高者其
感深跡異者其致遠委碧峰之窈窕辭紅樓之婉婉下
山有路初期攜手同歸窺戶無人終歎往而不返嗟乎

貞志可嘉高節惟亮同胚渾之凝結異追琢而成狀孤
烟不散若襲香於爐峰之前圓月斜臨似對鏡於廬山
之上形委化而已久目凝睇而猶望悲夫思婦與行人
莫不覩之而惆悵

望夫石賦

明 錢文薦

石乃堅確人則虛靈何凝眸而注戀忽變質而呈形原
夫念遠興思登高引睇漆膠愛結絲蘿恩締別去經年
憂來積歲徒託夢想難忘盟誓心惻惻以抱嗟目盈盈

其垂泪恐枕衾之便歇悲日月之將逝遂乃杳然無知
介乎不轉獨含硤砢誰覩婉孌心怨難磨眉顰莫展傷
彼委蛻令人涕泣徒觀其幻身雖化愁意猶存袖翻竹
色韞點苔痕勢亭亭而不墜形落落以無援積千年之
離緒消萬里之遊魂則知望絕倚閭歡辭舉案攜手靡
及捧心徒亂窺蜀鏡而輝掩指爐峰而香斷結離腸於
九層葬蓮嶽於千瓣於是豎芳標傳苦節謝雲雨凌霜
雪清風播以無窮皎月映而不減留孤影兮異代結相

思兮同穴可憐哉石雖粗厲情本綢繆款樹聲應遭鞭
血流遇嘯歌而動魄聞佛法而點頭儻雙星之復照當
五色之仍浮斂恨每孤立懷貞空延佇但教東海可揚
塵神化何知不美女

石姥賦

宋文同

上簷崙之飛泉兮披蒼翳之榛莽
骸倦歊而膺喘兮窮其巔於絕岨
爰有石而跂跂兮旁無他而相伍
色黧黝而骨勁劣兮具支節而帶
文縷其遠睨之若人兮迫猶

疑其蹲虎里俗神而甚恭兮號相尊其曰姥謂遽亟而
丐貺兮緣其求而下予忽旱陽赫而上熱兮飛光流而
燎土燁多稼以巨甌兮烹羣命於碩黼走羣靈而莫咎
兮後率歸而此慙役稚耄而竭蹶兮來號呶而詔誨會
諸力以掀揭兮使轉移其常處靈歛然而見景怪兮衆
外愕而中怖滄堀堦而下發兮鬱黯黶而上布憺砰磕
而中作兮漭滂沱而四注回極熾而施大潤兮曾不暇
乎旋步已復還其故立兮各再拜而引去問其端而何

從今年皆失其幾許吾聞懷澤之與符陽兮亦有石為
牛鼓彼民釁而擊之兮常以旱而取兩宛其於爾為類
兮彼又載於國譜噫惟皇之大職兮繫陰陽之煦姬奚
磊砢之頑質兮輒矯權而自主事豈無於適然兮而惑
者槩從而為語皇忽寤而震恚兮列罪目而爾數訶星
士以施梏兮敕雷將而揮斧赫電火而灰爾兮鼓箕風
而蕩汝闕大空而泮散兮一磨剋其處所俾愚黎之倂
正兮識惟皇之覆露皇未寤而民尚惑兮徒吾髀之長

拊

太湖石賦

有序

宋陳洙

客有嗜太湖石者圖其形示余命為賦其辭曰

江之東直走數百里有太湖兮澄其清湖之浪相擊幾
千年有頑石兮醜其形徒觀夫風撼根折波流勢橫神
助爾怪天分爾英駭立驚犀低開畫屏素烟散而復聚
蒼苔死兮又生譬夫枯槎浮天黑龍飲水鬼蹲無狀雲
飛乍起稚戲攜手獸眠盤尾大若防風之骨竅如比干

之心蜜房萬穿秋山半尋子都之戟前其鍛韓稜之劍
利於鑄若乃湖水無邊湖天一色露氣曉蒸蟾津夜滴
伊爾堅姿峭兮寒碧千怪萬狀羌難得而剖悉我將弔
范蠡於澤畔問伍員於波際原君厥初何緣而異公侯
求之如張華之求珠衆人獻之如卞和之獻玉植於庭
囿視之不足噫爾形擁腫兮難琢明堂之礎爾形中虛
兮難刻鴻都之經用汝作礪兮汝頑厥姿攻汝為磬兮
汝濁其聲亡所用之而時人是寶余獨掩口盧胡而笑

子之醜

採石賦

有序

宋程俱

建中靖國元年以修奉景靈西室下吳興吳郡採太湖石四千六百枚而吳郡實採於包山某獲目此瑰奇之產謹為賦云

吳吏採石於包山也洞庭鄉三老趨而進揖而言曰惟古渾渾物全其天金藏於穴珠安於淵機械既發剖蚌椎礦不翼而飛無脛而騁剗山探海階世之競迺若富

媼贅瘤則為山獄茂草木於毛膚已蘄巖於骨骼與瓦
甃其無間何於焉而是索今使者窺複穴蕩沈沙搜奇
礪於洞脚剛巧勢於丘阿呼靈匠以運斤指陽侯使息
波豎江山之萼萼續劒閣之戔戔莫不剔山骨拔雲根
貞女屹立伏虎晝奔督郵攘袂以相晚令吏臨江而抗
尊雖不遭於醢沃豈有恨於苔痕嗟主人之不見似羊
牧之猶存何一拳之足取笑九仞之徒勤既而山戶蟻
集篙師雲屯輸萬金之重載走千里於通津使山以為

骨則土將圯使玉以為璞則山將貧煮糧之客歎絕年
之無飽談玄之老持一法其誰論嘗聞不為無益則用
之所以足惟土物愛則民之所以淳怪斯取之安用非
野夫之樂聞敢請使者吏呼而語曰醯雞不可與語天
蟪蛄不可與論年矧齊侯之讀書豈輪人之得言三老
曰極治之世樵夫笑不談王道至聖之門鄙夫問而竭
兩端野人固願知之對曰上德光大孝通神明闡原廟
之制安在天之靈以謂物不盛則禮不備意不盡則享

不精故金瑰琛琲天不祕其寶樟楠梗梓地不愛其生而青州之怪猶未足於充庭故於此乎取之且鑿太行之石英採穀城之文石以起景陽於芳林者魏明之侈陋也菲衣惡食卑宮室以致美乎祭祀者夏禹之勤儉也上方戒後苑之作緩文思之程示敦樸以正始盡情文而事神此固上德之難名者矣抑嘗聞之西有未平之羌北有久驕之虜顧喋血之未艾乍遊魂而送死方將不頓一戈不馳一羽殄醜類於烟埃瞰幽荒於掌股

庶黃石之斯在儻素書之可遇抑又聞之三德雖修不
遺指佞之草萬國雖和猶泰觸邪之獸蓋邪佞之蠱心
猶膏肓之自腠雖屬鏤之無知顧尚方之奚裒故將鑄
采石以為劔凜豎毛於佞首若是則在邊無汗馬之勞
在庭無履霜之咎也抑又聞之堯不能無九年之災湯
不能無七年之旱雖陰陽之或乖豈閉縱之可緩故將
放鞭石於宜都回雨暘於咳眊抑又聞之扶耒之子有
土不毛抱甕之老有茅不蔕富者侈而貧者惰遊者逸

而居者勞雖齊導之有素奈狡兔而是逃故將取嘉石
以列坐平罷民於外郊抑又聞之日不蔽則明川不開
則清聽之廣者視必遠基之固者室不傾方披旒而出
黠俾伐鼓而揚旌蓋蕭牆之戒坐遠於千里朽索之馭
益危於薄冰矧四者之無告尤聖人之所矜故將盡九
山之赤石達萬寓之窮民三老悚然而興曰聖化蓋至
此乎吏曰此猶未也若其造化掌中宇宙胸次彌綸兩
儀而執天衡變理二氣而襲氣母此庖犧之婦所以引

日星之鉞縷方將鍊五色以補天育萬生於一府既無
謝於襄城之師又何驚於藐姑之處吾亦與汝飲陰陽
之和而遊萬物之祖矣又何帝力之知哉三老稽首再
拜曰鄙樸之人鹿豕其遊聾瞽其知竊臆妄議乃命知
之

凝雲石賦

元袁桷

文登之宮積濤成雪天風盪摩海氣幻滅欽崙蜿蜒堅
若金鐵大者成巒小者成穴蜂房羣綴蟻曲百結爰有

張子挾奇發珍藉以文錦炷以古薰陋博山之侈靡髣
爐峯之氤氲湛然塵消號為凝雲有客哆而笑曰南山
朝暾蒼蔚無垠太素為母五嶽為賓含虛成形積潤以
神今子友一卷於几席雲何自而凝哉張子倚梧而言
曰窘尋丈者不能以喻大語荒忽者適足以資怪人惟
至靈品物是賴明而通之呼吸萬籟決為奔騰興為靈
霸其來無趾其去莫閼惟古至人韞玉以匱藏明於幽
養神於獨內澄外觀嗒若槁木靜以自儀無喪無辱念

此石友其德不瀆燕居相忘庸以薰沐則夫所謂凝雲者不待於外而自足也客喜而笑遂為之賦

試劒石賦

有序

明王寵

石在虎丘道傍云吳王鑄劒成而試之或云秦始皇掘得吳殉劒而試之茲兩存其義云

赤堇之精邪溪之英伉儷翦爪百鍊始成太陽五金寄氣託靈龜文縵理價重連城其鏐瑩冰其鋒凝霜脊挾霆威鐔流電光楨烏揚輝慧難刷芒斂以鵜膏磨以粵

矧走蚘蟊於淩竭飛天驕於旋冥十步去一人千里不
留行惟時皆順理之事當晦其迹而國有逆理之謀則
見其形故無道則去有道則呈也就爾長一國者用之
盍刑長頸之宿讐可刎佞舌之宰嚭夫何反賜乎忠臣
是倒持而莫知所以乃自絕夫至德之開國致伯業之
就圯俾若君天下者得之宜斬臂鷹之禁術當誅指鹿
之閹豎夫何反加乎令子是逆施以亂人之紀乃自傾
百二之山河致鮑腥之不已妄肆一時之暴空遺萬年

之恥於乎青天可倚白雲可挾雖有利器兮那克任其
剛烈博浪之挫未明靈姑之辱莫雪彼磐陀有何辜兮
徑劈之齊裂徒裝駕乎猛鷲曾未翦除乎妖孽想當時
破業薛震訇割號罔兩於巖扃飛火電之列缺駭海山
之巨靈迸丹丘之鬼血故於歷世之千祀猶存雲根之
兩截蝕苔蘚之青蒼示隱磷之瞥屑使後人之來觀訝
靈蹤之未滅顧世事之若茲爰長歎而欲咽

土賦

唐

呂太一

一闔一闢分陽分陰坎為水兮離為火東方木兮西方
金惟土德之為大處中位而君臨寒暑不能易其節鬼
神無以測其深吐納清濁區分寓縣帝軒感氣於星斗
虞舜降精於雷電爾其荆河墳壤淮海塗泥草木漸包
於赤埴璆鐵作貢於青藜火以炎上為母水以潤下為
妻黃白分於雍冀官位列於東西蒸之以為城闕北連
朔野累之以為臺觀上構虹霓為海為河為牛為馬起
圓規於陣法美教化於王者負之為模胡人失其膽氣

得之為祥晉卿載於原野且久且大非名可名定剛柔
於坤德合絲竹於宮聲夫其為重也封割五色分茅錫
社夫其為厚也包括萬象含姿育靈處瘠則勞處沃則
逸白獸忽見籟羊間出體均物而為象抱溫柔以成質
舟航纔盡則青縷飛神六五既臨則黃裳元吉萬國收
其利三公主其秩因覆簣而成山為幽居而鑿室不借
譽於龍鳳直養德於麒麟失之則昆蟲作孽得之則宗
族以親雖鼇足初分重濁者為之地而羊角勃起輕清

者為之塵授之可薦於宗廟捧之未塞於孟津起刑馬而為首祀勾龍以為神漢廟玉環方之則君王納諫豐城寶劔拭之則光彩射人含物吐象包藏玉石均王四時卑陞三尺運乎虛舟之中不以為損捧乎泰山之上不以為益土之為德也重土之為性也平爰稼穡而為務被朱紫而為榮余以既藉形體承恩天壤公和之山窟非陋子猷之冬林自賞先君列國猶未斷於封疆軒佐吹塵直庶幾於夢相

土賦

以中方正色繁
育生類為韻

唐

韋

岫

質付坤元形分地類有持帶山川之力有長養稼穡之
利結為大塊中含萬物之根充被方輿外定九州之位
於是黃帝后土怒而交爭曰天有兩曜日為最明地有
五行土為至精人無我而不立子無我而不成故禮得
之而以壇以墀君得之而以社以城子言各執其一端
子智不出乎四生向者夸競交肩紛紜未息殊不知皆
在五土何自德色木之始叢榮本茂葉秀枝繁不依於

土何因託根火之重赫奕華夏照耀乾坤無吾為土雖
猛不存金生於山山吾所育水出於地地吾之族若藏
礦朴於峰巒化江湖於原陸子何有哉吾為五方之主
為萬聖之雄造邦本立大中布而為金木水火分而為
南北西東使百王之傳授若四氣之始終皆德非博厚
故號不統同國家保大定功體元立正法土德受天命
陵無一抔之盜貢有五色之盛合為應鼓擊六氣以還
淳累作春臺熙萬人之遂性子盍鳩合異類率賓殊方

歸有極贊無疆帝乃約束遠近神乃糾合要荒咸鞠躬
離位厥角來王自是盡四夷之君長皆朝我唐

五色土賦

以皇子畢封依
色建社為韻

唐

崔損

至哉土德光含五色其色也辨五方以建侯其德也發
萬物以生植自夏禹而作貢在徐方而是職王者立社
以封疆諸侯苴茅而有國於赫巨唐德之皇皇實秉土
而化康采大漢強幹之宜裂地以爵法有周維城之制
分土而王各班其位各正其方用甲日而靡咸建陰氣

而允臧定五方而式序分五色而有章平野烟消發卿
雲之瑞彩高天雨霽浮麗日之重光衆色環封所以示
外共其方職正色居上所以表內附於中黃觀其儀則
知大君之有弼稽其旨則知邦伯之有秩列三才則惟
數在五叅十端則惟德居一既明既麗可以比乎天文
不騫不崩所以保乎陰陽配皇王之永久齊天地而終
畢矧夫經邦理社必土是封光昭聖德叶贊時雍將尊
天以親地在侯土與國社既蕃翰乎四海實底寧乎天

下若然者君立社以布政臣受土而宣威象君臣之同
理知社土之相依是以成百王之則作萬邦之憲珪璋
玉帛莫不因我而執公侯伯子莫不因我而建土之德
也斯美社之義也奚擬其色也匪同五星而乍連乍散
其質也各表一方而嶽立山峙有以崇國祚於我皇有
以同盤石於宗子夫如是則其義廣矣豈斯文之所能
盡紀

五色土賦

以皇子畢封依
色建社為韻

唐
盧士開

尊彼國常乃立人極依大社以封土命諸侯以方色木
官復位東極於焉必書火正是司南方由之可識西同
白帝之象北察玄武之職配中黃而立名覆四方而作
式於是端宸穆穆授策皇皇賢戚封建君臣樂康既載
人之爾厚亦植物而惟良可以載八紘包大荒豈離邊
於爾邑盡東南於我疆昔神黷無厭聞草故於有魏天
祚明德遂惟新於聖唐總祝融與蓐收臣玄冥與勾芒
知合之以濟代故貢之以來王守於爾位亦有寵子思

剪桐而是立故分茅以共理所以維城所以撫封爰作
稼穡錫之附庸列五色以相備和八音以相從色能惟
正音乃叶雅將察之以報功故封之以立社惟人是恤
選賢以建仰夏王之攸敷法周官之大憲胙之而氏可
命相之而宅可依五德聿修萬方知歸即之也真彩煌
煌望之也靈壇巍巍足以表正方夏發揚德輝等乎珪
瑞叶以元吉建樹侯家藩屏王室分之惟五行之惟一
實邦家之永固與天壤而齊畢

黃賦

以平上去入為韻

唐張階

堪輿之內羣象茫茫均四時之辨物列五色以居方名
可大者其惟中黃吹律成音考定宮商之韻麗天為則
遙分日月之光石在穀城之下氣流華闕之傍雲瑞命
官而共治星見知芒之莫當恒發揮於煜煜寧見混於
蒼蒼黃之為用時義大矣揣稱之功請言其始土德載
物首更王之五行河水流謙恒曲成於千里鶴拂羽於
太液龍弄鱗於成紀悲哉秋之為氣歲將暮止菊花可

折凝曉露而含光木葉既零拂涼風而亂起夫惟色有
其變用無不遍染素絲之正色映飛塵而不見合氛昏
而暫隱向晴暎而復見漢霧塞而呈災秦蛇夢而命莫
乃有號國窮士非聖不迷務本於三學道於一雖觀色
而託賦猶守中而靡失希執念而見升願啓心而就日

土風賦

有序

唐
闕名

班固曰人含五常貴於萬彙剛柔緩急音聲不同繫水
土之風氣則謂之風其好惡取舍動靜不恒隨君上之

情欲聖唐四三皇而六五帝一六合而先宅覽職方圖
山川盡見歲七月木鐸徇於路命州里舉賢良於我睢
陽古之大郡也唯君子能通天下之志也其辭曰

吳季札挺生江國自南徂北聽羣樂之存亡觀諸夏之
臧慝乃言夫大雅小雅周南召南陳俗夸而奢其國無
主韓地薄而險其人不堪燕都渤海秦負汧隴俠客憑
陵世家淫勇顓頊之居衛也桑間濮上務耽聲色太公
之存齊也冠帶衣履唯勤組織洙泗之間既富財力腎

畢之下彌重獵弋冀州則紂之餘烈易為讐寇合浦則
蠻之獷俗相尚戰鬪吳南有豫章之基燒銅山而煮鹽
海楚東有雲夢之區鞭火耕而驅水耨豈若睢陽城臨
氏房其地平促其人溫良昔者舜漁雷澤堯作平陽天
乙都亳沛公潛梁故地多君子而風有先王富禮樂盛
文章魚鹽委積士馬精強亦有顏色野人居宋而生孔
子漆園傲吏隱周而號蒙莊韋氏以占星著族楚宮以
揆日居方宓子賤聽訟築臺坐空囹圄巫馬期勸農作

宰克正封疆亦有高辛故郡下邑軍塲蔡走定陶之國
晉入沙隨之鄉與夷出盟於瓦屋郤缺來會於承匡聊
采綴而為賦叙菁華而未央言其國之始祖微子封於
斯土先膺宗周之錫命招納暴殷之餘戶宅陶唐火正
之監就彭城鐵官之估於是孟諸為澤芒山為圃日尋
干戈雲列羣伍起臺十仞作室百堵按弓甲飛樓櫓橫
鈞臺伐金鼓討曹滅衛侵鄆掠魯會盟於鴻口之亭繳
射於龍遊之浦及其楚國圍急澤門役苦外則盱眙而

歌內則折骸而哺妖星去國所移者三怪石隕空視之
則五其後漢分元弟出食於梁文帝則錫茅而建社景
帝則肅桂而稱觴由是彩艇畫樓鋪鴈池以千里蘭軒
竹閣澄猿巖而四起徵廐馬於邊徼選宮人於街市千
乘出車百金練士煌煌煒煒而軍容備矣南面稱霸而
朝天子若乃秦名碭郡禹作豫州城池競於春色車騎
溢於川流惠連則詠南山以作賦長卿則背西蜀而來
遊入瓜亭而避暑臨穀塾而迎秋弔仙人於蒙邑祠關

伯於商丘想華門之瘕狗歎梁野之妖牛並忘歸於此
地充近侍而淹留別有忠臣壯士貞夫孝子五侯競立
三王俱死英靈遽見商摧未已雖埋骨於黃塵俱列名
於青史當今奄有萬國承平百年化被則如春露之沾
草文同則若夜星之拱天惟茲都之宏壯比列土而居
先屬城有師何代無賢伊昔全盛莫之與競食客駢闐
諸侯聘命旌旆互出臺殿交映忽瓜剖而豆分若烟收
而雨竟已矣哉中則傾兮滿則缺陰靈起兮陽精滅始

看春樹歇芳菲已見秋源漲沙雪自昔雄材與壯氣莫
不埋恨而吞噬七十里之城郭仍在一千年之綺羅都
絕京兆杜公久遊關東臨少昊之秋月過梁王之舊宮
食水土問人風執官曹而正直抱身鏡而清通識寶者
不遺於草澤懷材者喜遇於良工但能任土而作貢則
我梁國之不空

泥賦

有序

唐
鄭惟忠

語曰等級懸隔有似雲泥然雲高則高矣如其不義猶

為夫子所輕故曰於我如浮雲泥卑則卑矣苟不可棄
且見莊生所重故曰曳尾於塗中吾少也嘗覽左太冲
詩曰賤者雖自賤重之若干鈞感斯言之有徵故為泥
賦

嘉洪鑪之造化物無象而不甄惟茲泥之為質諒稟之
於自然雖體潤性柔而名卑質賤不同塵以苟出必感
澤而斯見信厚地之所生匪膏雨而不變同賢良之韞
匱候聖明而方薦若乃花水行落莢雨將餘交衢蓄潦

曲浦含汙望之疑實即之也虛動而為有靜而為無苟

具形之所踰必觸類而圖諸託龜文而成印寫鳥跡以

為書蹤發追風之馬轍閉流水之車於是陶鈞賦象刻

削成器固應用之無方任良工之所肆順規矩而畫一

循制度而無二裁無不成擬無不類以土為質以水為

位位去質沈復歸乎地彼木偶之漂泊萍流之自恣推

移兮莫識其始終汎濫兮莫知其所至若乃蘊彫草於

閒館含芳樹於禁闈不緇白玉之彩徒混明珠之輝帶

晴牛而暫落逐春燕而還飛何茲物之無識亦應命以
知機本乎形而入用乃委質以合所塗城則踈勒解圍
封關則峭函致阻及其見棄形晦跡淪無勞切玉之劒
自落成風之斤體伊泥之應變時可同乎人志類明鏡
之受物若洪鐘之虛已既懸絕於白雲徒隱淪於綠水
伊吾人之非賤竊亦有感於斯矣

塵賦

有序

唐
謝偃

余執性介直動多違忤茲讀老子至和光同塵竊有慕

焉因而賦之

伊大噫之扇物氣無繫而不揚惟茲塵之宜昧何動息
之順常若乃寄形大颺託質厚地倏爾而往忽焉而至
乍徘徊以上騰或飄颻而下墜起彼集此不失厥位居
無不安涉無不利似達人之推理任逍遙以自肆若夫
陰風發陣雲屯鼙鼓震紅旗翻千乘動萬騎奔中原以
之黯色白日為之晝昏其興也勃其息也漸或聚或散
乍舒乍歛細不可拾輕不可掩蒙籠篋笥幕厯茵簞隨

時無競應物不違值細雨而暫息逢輕風而復飛霍霍
靡靡零零霏霏將晨軒而並出與暮蓋而同歸任動靜
而無累似識變而知機若夫拂珠履生羅襪積菱鏡而
鸞沉下雕梁而歌發散瓊臺而類粉布玉階而似雪蒙
鳳輦於銅衢翳龍媒於金埒有動必隨無空不遍出入
青瑣遊揚紫殿流細影於迴裾亂浮香於舉扇隱洞房
而難覩因隙光而可見既洋溢若浮烟又散漫如流霞
至如化衣京洛鍊石仙家色侔雨壤影雜飄沙逐奔蹄

而起亂隨驚輪而飛斜近則昏肝蔽陌遠則晦景韜霞
疑竊食於顏子先甘餌於玄蛇惟紛吾之孤介驟萍流
而蓬徙既守愚以周直每受訕而招毀屢空范丹之甌
時卧李恂之被未齊物於莊生庶同塵於老氏

珠塵賦

以輕細若塵風
來遂起為韻

唐

王 榮

丹海之濱青珠似塵蓋輕細以無滯遂飛揚而有因或
煦或吹自得霏微之象乍明乍滅誰分圓潔之真稽夫
始自水涯俄從風起縈空而耀耀奚匹散彩而冥冥相

似又云來或鳥銜積如丘峙半穿圓隙影寒於雲母屏
中或委空牀光亂於水晶簾裏徒觀夫的皦晶熒星流
雪輕集素衣而不垢侵曉鏡以逾明落淵客之盤驚炫
耀以同色撲江妃之珮訝依微而有聲至如琪樹春歸
玉樓景霽揉瓊蕊以光碎浮瑣牕而影細闌干輕舉同
羅襪之生時璫錯斜流有歌梁之下勢由是散亂清景
光芒碧空昔隱耀於泥沙之地今揚輝乎掘堞之風不
逐軒車之後不在京洛之中雨過而光騰鮫室扇迴而

影動龍宮如是則可用增山難將彈雀惹晴葉於垂樹
間游絲而綴箔自南自北低瑤席以紛然匪疾匪徐拂
璇題而炯若況海日方盡陰飈乍迴與白駒而競起將
野馬以俱來魏國飛時頓失照車之體陳王望處全無
凝榭之猜懿夫朗潔難逾飛騰自遂非罔象之見索異
無脛而斯至或曰泰山猶不讓微塵況是珠璣之類

陳塵賦

以不依光末難
見微質為韻

唐
蔣防

惟陳有輝惟塵是依微明散亂若動如飛殊向晦以宴

息類趨明而識機不逐大車寧發詩人之歎無昏廣陌
詎緇遊子之衣觀乎杲杲初陽沉沉閤室纖光乍進爰
委其質忽烟涵而霧貫每延風而寫日透綺帳而偏明
暖丹楹而乍失不重乎金屋不貴乎華堂隨明則著在
映而彰代皆擇其居我則不辭於處隙代皆異其志我
則不厭乎和光似有情而聚散若任理以行藏漠漠如
流翳白駒之逸影濛濛不息起清唱於雕梁惟深惟微
于闔于闔來不可止去不可遏語其志也流形似競於

分陰語其微也弱質已侔於毫末豈不以循其陳襲其
輝洞幽房之曠朗籠踈牖之霏微道或未行歎浮沈之
異路時而後動任韜晦以同歸散漫迴環空濛徭練謂
醯雞之乍覩疑野馬之潛見不爭鄰女之光不雜寒階
之霰故知委范甑者志有所未安感孔顏者時有所未
歡處沉冥而匪異辨疑似而愈難曷若因孤光而有託
附影流而為觀者哉所謂暗而能彰虛而能受望彈冠
而自必騰清路而何不幸承命於光塵賦斯文而藉手

陳塵賦

以不依光末難
見微質為韻

唐

楊弘真

陳有塵兮則惟其常日緣隙兮亦孔之彰何在陰而滅
彩能委質以和光藹若成規任隙中之小大紛然無緒
隨日際以悠揚觀夫熠熠孤光霏霏素質盡方圓之所
至滿虛明而不溢不灑不埽宜靜以探微或歛或吹則
動而逾密何幕歷以可久混空濛而為一一點凝輝異
出同歸豈開簾而霰入疑向牖之蟲飛其虛其徐有若
無兮漠漠不皦不昧散而聚兮微微既不足以凝榭又

何虞於化衣想夫向晦長存匪陽不見的爾東去忽焉
西轉嗟柳絮之從風訝雪花之見睨翔而不息安即為
難挂高棟而將晚留空隅而助寒疑琢玉成環環中屑
墜若窺壺入洞洞裏雲殘美纖姿而無隱雖小道而可
觀原夫自託於空而隙能善誘無求於日而隙以虛受
察之昭精攬之盈手同白駒之滅沒非野馬之紛蹂遠
窺濁水斯自異於浮沈仰觀歌梁必坐分於妍不美其
含華有耀委照無違想剝廬之斯衆知舊館之猶稀安

寢之堂就餘光而若在偷光之壁尋微燭以相依何異
暗室無欺明誠必達伊若質之隱見在無私之與奪儻
高鑒以吹噓願飛翔於天末

陳塵賦

以不依光末難
見微質為韻


唐
趙蕃

日入空陳塵生夜光嘉的的以初引見冥冥而自彰乍
拂圓輝積纖形而散亂時搖輕吹翻弱質以悠揚泊夫
託彼曜靈起茲虛室恒紛空而色碎每燭幽而景密仰
孤光之未及猶在暗而效質由是亭亭旁照羃羃斜飛

必炯爾以賦象終飄然而相依故所以臨素壁隱清輝
若下歌梁方凝姿而漠漠如驚陳榻幾引耀以霏霏是
故當皎晶以自飛引虛光而將扇振遺芳而交集流細
影而倏遍散乎幽處非厚地而不揚透彼無間庶高天
而可見爾其晶明下射香靄中攢景熠熠以將盡視規
規而尚殘及晶輝之餘斜分稍易當冥濛之際仰望誠
難至若窈窕孤懸熒煌相蹂靜對幽闥閒臨虛牖窮隱
見而不讓隨方圓而可久若然者則混而同貫自得審

於浮沉浩以相鮮孰可辨於妍不是以杳如有待紛若
無機穿棟宇以光小拂簾櫳而色微片影方呈似鑿幽
人之室輕文靡定如縑遊子之衣故其餘照乍沈纖埃
勢達既在陰而不昧將耀質而難奪亦何必越茫洋散
空闊願依大廈之內永寄流光之末

御定歷代賦彙卷二十三



總校官庶吉士臣張能照
校對官編修臣馬啓泰
謄錄監生臣夏清和